

17
18
19
20
21
22
23
24
25
26
27
28
29
30
31
32
33
34
35
36
37
38
39
40
41
42
43
44
4


石錄

二十卷

札記

今存目


附



5140

564.3

部 4



金石錄卷之二十五

跋尾十五
唐偽周

唐褚亮碑

唐洛州刺史賈公清德頌

唐歐陽詢妻徐夫人墓誌

唐襄州刺史封公碑

唐襄州孔子廟堂碑

唐奉禮郎岑子興墓誌

唐醴泉縣令張仁蘊德政碑

周武后昇中述志碑

結一廬朱氏贖餘叢書



周武后封中嶽碑

周昇仙太子碑

周大雲寺碑

周武士護碑

周孔昌寓碑

周崔敬嗣墓誌

唐祝府君碑

唐秦州都督唐宗碑

唐工部尚書姚璿碑

結一盧朱氏贖餘叢書

後周宇文舉碑

唐魏叔瑜妻王夫人墓誌

唐兵部侍郎崔兢墓誌

唐中興聖教序

唐聖教序碑側

唐徐有功碑

唐國子祭酒武承規墓誌

唐陝州刺史劉延景碑

唐修封禪壇記

唐褚亮碑

右唐褚亮碑唐書云亮杭州錢塘人而碑云晉南遷家於丹陽按元和姓纂自有錢塘褚氏與亮族系不同唐史蓋失之

唐洛州刺史賈公清德頌

右唐洛州刺史賈公清德頌按唐史循吏傳賈敦頤敦實相繼爲洛州刺史長史有惠愛郡人皆爲刻石號棠棣碑今敦實之碑亡矣此碑載初除洛州制書有云三川之境是稱都會六條之寄允屬時英蒲州刺史賈敦

結一廬朱氏贍餘叢書

蹟體業強正識用優敏蓋其名乃敦蹟也又武后實錄敦實傳中亦作敦蹟以此知唐史傳寫之誤又按法書要錄此碑王知敬書以知敬所書他石刻校之字畫不類未知果知敬書否也

唐歐陽詢妻徐夫人墓誌

右唐歐陽詢妻徐氏墓誌云徐始以夫恩封渤海縣君尋加渤海郡夫人最後以子恩封渤海太縣君按本朝之制婦人旣封郡君或郡夫人再以子貴加恩則直封爲郡太君郡太夫人不復爲縣太君矣今徐旣以夫貴

封夫人後以子恩纔封爲太縣君蓋一時之制如此又不曰縣太君而曰太縣君與今名號亦異也唐世婦人封邑次敘史家不載偶見於此誌耳

唐襄州刺史封公碑

右唐襄州刺史封公碑宋之慈書字畫頗佳之慈之問弟也兄弟皆小人之慈奴事武三思三思五狗之慈乃其一以此知書特小技苟非其人亦何足貴哉

唐襄州孔子廟堂碑

右唐襄州孔子廟堂碑于敬之撰其前題魯大司寇贈

結一廬朱氏賸餘叢書

太師宣尼父孔丘廟堂碑銘春秋之法或書字或書名皆所以寓褒貶之意今敬之爲孔子廟碑而斥其名何哉

唐奉禮郎岑子輿墓誌

右唐岑子輿墓誌云君諱子輿字安道南陽棘陽人也曾祖之象祖文本父曼倩按元和姓纂及新唐書宰相世系表載曼倩四子獻羲仲翔仲休而無子輿今墓誌云次弟獻前太子典膳郎次弟羲前成均監主簿而無仲翔仲休墓誌旣云獻羲等則不載仲翔仲休容有之

惟子輿乃曼倩長子姓纂與世系表當書而闕者何也

唐醴泉縣令張仁蘊德政碑

右唐醴泉縣令張仁蘊德政碑長壽三年立醴泉尉顏真卿書按魯公雖嘗為此官然在開元間而魯公以貞元元年為李希烈所害年七十六上距長壽三年實九十餘載是時猶未生也又筆法與魯公他書不類以此疑有姓名同者然碑武后時立而不用當時所製字或云碑雖建於長壽中至魯公為尉重書而刻之未可知也

按新史紀傳魯公以貞元元年被害時七十六而舊史德宗實錄皆云歿於興元元年年七十七疑新史

結一廬朱氏積餘叢書

誤

周武后昇中述志碑

右周武后昇中述志碑武后自撰睿宗書碑極壯偉立於嵩山之巔其陰鍾紹京書字畫皆工妙政和中河南尹上言請碎其碑詔從之

周武后封中嶽碑

右周武后封中嶽碑已殘缺書撰人名字皆不可考然驗其筆跡蓋薛稷書也

周昇仙太子碑

右周昇仙太子碑武后撰并書昇仙太子者王子晉也
是時張易之昌宗兄弟方有寵詔諛者以昌宗爲子晉
後身故武爲葺其祠親銘而書於其碑君臣宣淫無恥
類如此可發萬古之一笑也

周大雲寺碑

右周大雲寺碑賈膺福撰并八分書其筆法精妙可喜
按唐舊史云武后鑄九鼎圖寫山川物象命工書人賈
膺福薛昌容李元振鍾紹京等分題之紹京之書世固
多有膺福筆跡雖僅存然世亦未有稱之者如昌容等

續一廬宋氏贗餘叢書

書遂不復見以此知士所以自著於不朽者果在德而
不在藝也

周武士護碑

右周武士護碑武后時追尊士護爲無上孝明皇帝命
李嶠爲碑文相王旦書石焉戎幕閒談載李德裕言昔
爲太原從事見公牘中有文水縣牒稱武士護墓碑元
和年忽失龜頭所在碑上有武字凡十一處皆鐫去之
碑高大非人力所及未幾武元衡遇害今此碑武字最
多皆刻畫完好無訛缺者以此知小說所載事多荒誕

不可信類如此

周孔昌寓碑

右周孔昌寓碑載其世系甚詳云宣尼父三十六世孫也十四世祖潛吳侍中生晉豫章太守竺竺生大尚書沖沖生大司農侃侃生祕書監滔滔生江夏太守俟俟生宋尚書左丞幼幼生尚書右丞遙之遙之生中書侍郎昌生齊散騎常侍珮珮生梁侍中休源休源生陳黃門侍中宗範宗範生陳散騎常侍伯魚伯魚生隋祕書正字德紹德紹生昌寓唐以前士人以族姓爲重故

結一廬朱氏賸餘叢書

雖迭更千百年歷數十世皆可攷究自唐末五代之亂在朝者皆武夫悍卒於是譜牒散失士大夫茫然不知其族系之所出豈不可惜也哉故余詳錄於此使後學論姓氏者有攷焉按此碑及梁史皆云休源沖八世孫而元和姓纂獨以爲七世孫誤矣

周崔敬嗣墓誌

右周崔敬嗣墓誌云祖咸考表而元和姓纂以咸爲誠表爲儀表又新唐書崔光遠傳中宗在房州官吏多不爲禮光遠祖敬嗣爲刺史獨盡誠推奉帝德之及反正

有與敬嗣同姓名者每擬官帝輒超拜後召見悟非是
訪敬嗣已死卽授其子汪五品官汪生光遠今以墓誌
考之敬嗣武后時實爲房州刺史然墓誌載敬嗣長子
悅次子協而無名汪者而姓纂亦云悅生光遠然則以
悅爲汪蓋史誤也敬嗣卒於證聖元年中宗反正其歿
已久屢遷他人官而不悟可謂昏矣

唐祝府君碑

右唐祝府君碑府君諱緜欽明父也碑欽明白撰今南
京有漢祝睦兩碑其一言君兆自重黎祝融苗胄其一

結一廬朱氏贖餘叢書

言其先高辛余按諸書重黎祝融皆帝高陽之後帝堯
高辛之子也睦碑旣云出於重黎祝融又云出於高辛
自相抵牾莫可考究而此碑引世本氏姓篇云祝氏軒
轅之後也史記周本紀武王克殷封黃帝之後於祝帝
堯之後於薊樂記云封黃帝之後於薊帝堯之後於祝
蓋以黃堯本下闕字同出有熊由此史傳相交祝薊互舉
參攷世本史遷近之然司馬遷史記於族系多采世本
不知世本果可盡信否蓋君子於學有所不知闕焉可
也

唐秦州都督唐宗碑

右唐唐宗碑云君諱宗字徵仁而唐書宰相世系表云名世宗碑又云祖諱子政而世系表作二政皆當以碑爲正宗宰相休璟祖也仕隋爲朔方郡丞行郡守事大業末爲賊梁師都所殺神龍中贈秦州都督

唐工部尙書姚璈碑

右唐姚璈碑按新唐書璈列傳云爲夏官侍郎坐族弟敬節叛貶桂州長史而碑云自兵部侍郎以敬節犯法改授司府少卿檢校定州刺史尋卽真轉都督廣循等

結一廬朱氏贍餘叢書

二十三州諸軍事廣州刺史後替還仍以前累重貶桂州又璈爲宰相時嘗爲西京留守而史不載璈以妖妄諂諛事武后其事蹟皆不足取而於官秩闕漏不可不記者所以正史官之失也璈微時所歷官列傳尤簡略今皆不復載云

後周宇文舉碑

右後周宇文舉碑盧思道撰其曾孫敞追建於神龍中以後周書考之官闕事迹多同惟碑云公諱舉字神舉而史但言名神舉而已又史云其曾祖名求男而碑止

言名求史云祖名顯和而碑止言名和亦皆不同其卒也史云宣帝以宿憾殺之而碑稱遘疾薨疑作碑者爲諱其事當以史爲正

唐魏叔瑜妻王夫人墓誌

右唐王夫人墓誌夫人魏叔瑜妻華之母也誌無書撰人姓名驗其筆法蓋華自書華以草隸擅名一時然石刻見於今者絕少此誌世尤罕傳云

唐兵部侍郎崔兢墓誌

右唐崔兢墓誌云公諱兢字明慎祖敦禮父守業按舊

結一盧朱氏騰餘叢書

唐書敦禮列傳云孫貞慎神龍初爲兵部侍郎元和姓纂新史宰相世系表所書亦同今以墓誌考之其家世及名位皆合惟不著其名而以明慎爲貞慎者皆唐史及姓纂之闕漏也

唐中興聖教序

右唐中興聖教序中宗爲三藏法師義淨所作唐奉一書刻石在濟南長清縣界四禪寺寺在深山中義淨真身塔尚存予屢往遊焉得此文入錄按御史臺記奉一齊州人善書翰武后時爲御史後坐誅翦皇族廢

唐聖教序碑側

右唐聖教序碑側云則天嘗得玉冊上有銘十二字朝野不能識義淨能讀其文曰天冊神皇萬歲忠輔聖母長安證聖元年五月上之詔書褒答按宋莒公紀年通譜武后以證聖元年九月受天冊金輪聖神之號故大赦改元先是司餼局人於水際得石函有玉冊云神皇萬歲忠輔聖母長安故改元協瑞其文與義淨所載小異云余嘗謂義淨方外之人而區區爲武后稱述符命可笑也然陶弘景號稱一代高士在梁武時亦屢上圖

結一廬朱氏賸餘叢書

識豈獨義淨也哉

唐徐有功碑

右唐徐有功碑徐彥伯撰以新舊唐史考之其本末皆同惟舊史云長安二年卒年六十二碑云三年卒年六十八新史亦云年六十八與碑合

唐國子祭酒武承規墓誌

右唐武承規墓誌蘇頌撰顏魯公家廟碑載魯公之父名惟貞字叔堅嘗爲太子文學今此誌題太子文學顏叔堅書豈非以字行乎家廟碑又稱叔堅受筆法於舅

殷仲容氏特以草隸擅名云

唐陝州刺史劉延景碑

右唐劉延景碑延景女爲睿宗妃生讓帝者碑云夫人房氏以景雲元年贈沛國夫人二年歲次丁亥附窆於延景之墓按睿宗以景雲元年六月卽位改元歲次庚戌明年歲在辛亥而碑作丁亥誤也碑載延景四子溫玉承顏瓊琪而元和姓纂以瓊爲瑗蓋姓纂之謬

唐修封禪壇記


右唐修封禪壇記賈膺福書初余得膺福八分書大雲

結一廬朱氏騰餘叢書

寺記愛其筆法後又得此記字爲小楷尤工妙可喜云

金石錄卷之二十五





金石錄卷之二十六

唐跋尾十六

結一廬朱氏臚餘叢書

唐并州長史崔敬嗣碑

唐贈右僕射王洎碑

唐雋州都督姚懿碑

唐盧懷慎碑

唐琅琊王沖墓誌

唐^玄元觀尹尊師碑

唐河侯新祠頌

唐郭知運碑

唐大雲寺禪院碑

唐六公詠

唐涼國長公主碑

唐衛尉正卿泉君碑

唐左驍衛大將軍趙元禮碑

唐王方翼碑

唐龍角山紀聖銘

唐冠軍大將軍臧懷亮碑

唐蕭灌碑

唐楊麻碑

唐汝陽王長女墓誌

唐南嶽真君碑

唐立梁宣帝明帝二陵碑

唐孝義寺碑陰記

唐景陽井銘

唐代國長公主碑

唐趙冬曦祭仲山甫文

唐解琬碑

唐贈兗州都督裴守真碑

唐屯留令邢義碑

唐并州長史崔敬嗣碑

右唐崔敬嗣碑按唐史崔光遠傳中宗在房州光遠之祖敬嗣為刺史盡誠推奉帝德之及反正有與敬嗣同姓名者每擬官輒超拜後召見悟非是訪真敬嗣已死乃用其子余集錄有光遠祖墓誌其卒在武后朝此碑敬嗣蓋中宗時誤遷官者也而碑乃云景龍元年有制追不時至中宗對宰相稱其姓名三令使者趣之及謁

結一廬朱氏賡餘叢書

見即日拜羽林將軍二說不同豈中宗既召見乃悟其非是歟

唐贈右僕射王洎碑

右唐王洎碑洎王仁皎父也元和姓纂唐書宰相世系表皆云名文洎而碑云名洎字文洎云

唐雋州都督姚懿碑

右唐姚懿碑懿崇父也據碑及唐書宰相世系表皆云公諱懿字善意而崇子奕碑與元和姓纂乃云名善意豈非以字行乎懿隋末唐初人仕至雋州都督開元閒

崇爲宰相立此碑

唐盧懷慎碑

右唐盧懷慎碑蘇頌撰其敘懷慎官闕甚略云公諱德慎字懷慎而史不載其字又云上因游鄆杜北望京闕歸然有公之別廬抵其宅甚陋據此所書乃明皇嘗親幸其第而史云馳使問之非也史又云懷慎屬疾宋璟盧從愿候之臨別執一人手曰上求治切然享國久稍勸於勤將有憊人乘閒而進矣蓋謂楊李也果如此懷慎可謂先見然獨新史有之舊史不載按懷慎以開元

結一廬朱氏臆餘叢書

四年卒是時明皇新卽位登用賢俊銳於爲治之時也乃曰享國久倦於勤何哉疑初無此事蓋唐史喜取小說所載故事多謬誤以此知是非去取秉史筆者豈可不慎

唐琅琊王沖墓誌

右唐琅琊王沖墓誌沖越王貞子也中宗遷房陵貞與沖謀反正舉兵未幾父子皆敗開元六年始詔陪葬昭陵武后革命毒流海內而唐之宗室被禍尤甚沖父子時畏誅翦故舉兵爾非有它謀也倉卒無援卒就夷滅

哀哉

唐_文元觀尹尊師碑

右唐尹尊師碑郭謙光八分書謙光八分初不見稱於唐人獨歐陽公盛稱之以謂不減韓蔡史李四家余因訪求久之得崔敬嗣及此碑著錄焉

唐河侯新祠頌

右唐河侯新祠頌秦宗撰云河伯姓馮名夷字公子潼鄉華陰人也按章懷太子張衡傳注引聖賢冢墓記亦云馮夷者_弘農華陰潼鄉隄首里人服八石得水仙爲

結一盧朱氏贍餘叢書

河伯又引龍魚河圖曰河伯姓呂名公子夫人姓馮名夷三說雖異然其爲無所稽據則同也於乎自古荒誕之說惑人雖聰明之士猶或不免況庸人乎

唐郭知運碑

右唐郭知運碑蘇頲撰知運有兩碑其一張說文唐書知運傳載其子二人曰英傑英又而蘇張二公所爲碑書其子四人曰英傑英奇英協英彥而無英又歐陽公疑焉以謂英奇等三子在唐不顯史家闕漏尙或有之英又嘗爲西川節度使其事甚著史官不應差其世家

而蘇張二公作銘在知運卒後不遠亦不應闕其子孫
莫可究其孰失余按代宗實錄云英又知運季子而元
載所爲英又墓碑亦云隴右節度使知運公之皇考也
然則英又爲知運子無疑又按英又碑云公以天寶二
載筮仕蓋知運以開元九年卒明年立碑碑所載諸子
皆已有名位英又時方孩幼且未從仕故碑不載爾余
又嘗得徐浩所爲英傑碑有云移孝於忠二葉四將齊
名當代同氣十人然則知運諸子碑傳闕漏者尙多不
獨此三人而已

德宗實錄又有郭
英幹云英又弟也

唐大雲寺禪院碑

右唐大雲寺禪院碑李邕撰并書初武后時有僧上大
雲經陳述符命遂令天下立大雲寺至開元二十六年
詔改爲開元寺此碑十一年建故猶稱大雲也

唐六公詠

右唐六公詠李邕撰胡履虛書初予讀杜甫八哀詩云
朗詠六公篇憂來豁蒙蔽恨不見其詩晚得石本入錄
其文詞高古真一代佳作也六公者五王爲一章狄丞
相別爲一章云

唐涼國長公主碑

右唐涼國長公主碑蘇頌撰明皇書公主睿宗女也新唐書列傳云字華莊而碑云諱窈字花粧傳云下嫁薛伯陽而碑云嫁溫彥博曾孫曦按新史睿宗第三女荆山公主已嫁薛伯陽當以碑爲正

唐衛尉正卿泉君碑

右唐泉君碑泉君者高麗蓋蘇文之孫泉男生之子也高宗時與男生同歸朝仕爲衛尉卿按唐書及元和姓纂皆云名獻誠今此碑乃云諱寔字行於代而闕其字

結一廬朱氏牘餘叢書

不書又姓纂云獻誠生_(玄)隱而碑但云名隱而已獻誠出於夷虜事跡無足考究錄之以見史傳所載名字異同爾

唐左驍衛大將軍趙元禮碑

右唐趙元禮碑潘肅撰元禮趙麗妃之父本山東倡也明皇在潞麗妃以倡得幸後生太子瑛開元初元禮父子皆超遷至顯官其卒贈越州都督諡曰忠詔爲立碑稱述甚盛夫爵祿天下公器所以待有德與功者雖人主不得而私焉明皇昵於內寵擢用匪人至爲賜諡立

碑尊寵如此使天下之士亦何所勸乎論者徒知明皇
自天寶以後綱紀廢弛卒致播遷之禍不知其衽席無
別履霜不戒所從來久矣

唐王方翼碑

右唐王方翼碑張說撰其事與唐書列傳皆合以校予
家所藏燕公集本不同者二十餘字皆當以碑爲是也

唐龍角山紀聖銘

右唐龍角山紀聖銘明皇撰按高祖實錄武德三年四
月辛巳晉州人吉善行於羊角山見白衣老父乘白馬

結一廬朱氏賡餘叢書

朱鬣謂善行曰爲吾語唐天子吾爲老君汝祖也今年
平賊後汝當爲帝天下太平必得百年享國子孫且千
歲太宗遣使者杜昂致祭須臾神復見謂昂曰歸語天
子我不食何煩祭爲高祖異之立廟於其地授善行朝
散大夫據碑稱是時太宗爲秦王討宋金剛所謂賊平
汝當爲帝者指太宗也其事可謂怪矣然碑與實錄所
載語頗不同文多不能備錄惟碑稱善行以武德三年
二月初奉神教至四月老子又見曰石龜出吾言實旣
而太宗遣昂善行乘驛表上比至長安適會郇州獻瑞

石如龜文曰天下安千萬日而實錄亦云郇州獻瑞石
有文曰天下千萬其語小異又碑稱善行絳州人而實
錄云晉州爾老子其生以清淨無爲爲宗豈身沒數千
歲而區區爲人稱述符命哉蓋唐太宗初起託以自神
此陳勝所謂卜之鬼者也史臣旣載於實錄明皇又文
之於碑遂以後來爲眞可欺罔豈不可笑也哉

唐冠軍大將軍臧懷亮碑

右唐冠軍大將軍臧懷亮碑李邕撰并書臧氏世墓在
耀州三原有數碑余盡得之元和姓纂云懷亮生希讓

緒一廬朱氏贖餘叢書

爲渭北節度使此碑具載懷亮諸子無名希讓者以余
家所有顏魯公書懷恪碑考之希讓蓋懷恪子云

唐蕭灌碑

右唐蕭灌碑張說撰云灌爲內直監以外艱去職當免
喪不就祥縞不撤几筵者久之夫禮爲可傳也爲可繼
也子路有姊之喪可以除之矣而弗除也孔子曰何弗
除也子路曰吾寡兄弟而弗忍也孔子曰先王制禮行
道之人皆弗忍也子路聞之遂除之灌父喪當除其母
無恙而過時不釋服不撤几筵豈禮也哉

唐楊麻碑

右唐楊麻碑題云義男光祿大夫前中書令上柱國越國公太子右諭德潁川鍾紹京撰銘并書麻中官楊思勗父也紹京出於胥吏無他才能特以夤緣附會致位宰相固無足道者然屈於闔豎至以父事之而又著之金石略無愧恥亦甚矣書之可以為後來之戒而新舊史皆闕焉故余詳錄之於此者有以見小人苟可以得利無不為也

唐汝陽王長女墓誌

結一廬宋氏贖餘叢書

右唐汝陽王長女墓誌甯王撰唐史及諸書汝陽王名皆為璿而此誌獨作淳誌甯王自作不應差誤按甯王諸子與玄宗子名皆從玉疑汝陽先名淳後改為璿唐史不載爾玄宗諸子名初皆從水後改從玉也

唐南嶽真君碑

右唐南嶽真君碑有別駕賞紫金魚袋光大睦歐陽公云賞紫蓋今借紫之比余按唐制自有借紫借緋而又有賞紫賞緋蓋以軍功被賞者耳

唐立梁宣帝明帝二陵碑

右唐立梁宣帝明帝二陵碑開元二十一年其裔孫嵩
追建其前題銀青光祿大夫黃門侍郎同中書門下平
章事而姓名已殘缺按唐紀開元二十一年韓休實爲
此官然則此碑乃休之文也碑後題金紫光祿大夫行
光祿卿駙馬都尉而姓名亦殘缺者蓋嵩之子衡也

唐孝義寺碑陰記

右唐孝義寺碑陰記初陳徐陵爲孝義寺碑至開元二
十三年徐嶠之爲湖州刺史再書而刻之因記其事於
碑陰嶠之自云陵十世孫按陳書陵以後主至德元年

結一廬朱氏贖餘叢書

卒距開元二十三年纔百五十餘年不應已有十世孫
又據嶠之父高行先生碑云曾祖儼梁岳陽王參軍則
是儼與陵同時而在其前不應爲陵五世孫以此碑陰
所書可疑然其筆法精妙非嶠之不能爲特恐書碑時
誤耳

唐景陽井銘

右唐景陽井銘文字摩滅後有記開元中江甯縣丞王
震撰震所撰記其前以爲序稱余莫知誰也其末乃云
蓋隋煬帝之所製耳然則未知果煬帝所製乎歐陽文

忠公曰煬帝躬自滅陳日見叔寶事又嘗自銘以爲戒
如此及身爲淫亂則又過之豈所謂下愚不移者哉余
以謂煬帝躬賊其父而奪之位其凶忍狂悖人神之所
憤疾死蓋晚矣至於長惡不悛以亡其國乃所當然又
何足議焉

唐代國長公主碑

右唐代國長公主碑云公主睿宗第四女也新唐史以
爲第五女蓋史誤碑乃公主婿鄭萬鈞撰

唐趙冬曦祭仲山甫文

右唐趙冬曦祭仲山甫文開元二十三年冬曦爲濮州
刺史因明皇耕籍田致祭刊此文焉按樂史寰宇記仲
山甫墓在雷澤縣西北一里墓前有祠堂石室而酈道
元注水經成陽堯陵北二里有仲山甫墓考地驗狀咸
爲疏僻蓋聞疑書疑爾余嘗得其石室畫像上有八分
書題云君爲從事時以字畫及衣冠人物驗之乃東漢
時所爲決非山甫墓漢末仲氏爲成陽大族堯母碑陰
題名數十人皆仲氏而廷尉定以下三碑尙存廷尉碑
云聖漢龍興家於成陽孟府君堯廟碑云惟仲氏祖統

所出本繼於成周之冑苗天生仲山甫翼佐中興宣平
功遂受封於樊周道衰微失爵亡邦後嗣乖散各相土
擇居帝堯萌兆生長葬陵在於成陽聖化常存慕巍巍
之盛樂風俗之美遂安處基業屬都鄉高相里因氏仲
焉蓋後人因仲氏葬於此遂誤指爲仲山甫墓其實非
也

唐解琬碑

右唐解琬碑琬武后中睿朝爲將有功新舊史皆有傳
所書事跡終始與碑多合惟碑與舊史皆云琬以開元

六年卒而新史以爲卒於五年者誤也

唐贈兗州都督裴守真碑

右唐裴守真碑云守真曾祖景周富平令祖正長平郡
贊治考脊鄮令新唐史宰相世系表亦云景生正隋散
騎常侍正生脊字歸厚爲鄮令而元和姓纂乃云正生
歸厚歸厚生脊者誤矣惟守真及其子耀卿碑皆云正
爲長平郡贊治而世系表言爲散騎常侍又云脊字歸
厚不知何所據也

唐屯留令邢義碑

右唐邢義碑邢義和璞父也元和姓纂云和璞父名思
孝爲豐州都督而碑乃云公諱義字思義仕爲屯留令
又姓纂云後魏光祿卿邢虬虬生臧臧生(玄)功(玄)功生
思孝思孝生和璞而碑乃云(玄)功之祖名子良皆當以
碑爲據

金石錄卷之二十六

金石錄卷之二十七

唐跋尾十七

結一盧宋氏贍餘叢書

唐八馬坊碑

唐忠武將軍王暕墓誌

唐淄州開元寺碑

唐吏部尚書楊仲昌碑

唐唐儉碑

唐龍門西龕石像銘

唐金仙長公主碑

唐雲麾將軍李秀碑

唐高陽觀紀聖德頌

唐駙馬都尉豆盧建碑

唐陳隱王祠堂記

唐崔潭龜詩

唐貞一先生廟碣

唐陳留尉劉飛造像記

唐棣王珍墓誌

唐金城寺放生池碑

唐多寶塔感應碑

結一盧朱氏騰餘叢書

唐滎陽王妣朱氏墓誌

唐武部尚書楊珣碑

唐宇文灝山陰述

唐永陽郡太守姚奕碑

唐雲門山投龍詩

唐忘歸臺銘

唐渭南令路公遺愛表

唐呂諲祠廟碑

唐呂公表

唐玉真公主墓誌

唐京兆尹鮮于仲通碑

唐慧義寺彌勒像碑

唐八馬坊碑

右唐八馬坊碑希昂撰開元之治盛矣監牧之制其詳如此錄之可以見當時之制焉

唐忠武將軍王暕墓誌

右唐王暕墓誌云父遂古皇駙馬都尉潁州刺史尚高安公主高宗大帝之女也按唐書高宗第二女高安公

結一廬宋氏贖餘叢書

主下嫁潁州刺史王暕天授中暕為武后所誅今此誌乃云名遂古唐初人多以字為名故名字混淆難考遂古豈非以字行乎

唐淄州開元寺碑

右唐淄州開元寺碑李邕撰并書碑初建於本寺後人移寘郡廨敗屋下余為是州遷於便坐用木為闌楯以護之云

唐吏部尚書楊仲昌碑

右唐楊仲昌碑席豫撰鄔繇篆仲昌有兩碑其一韓擇

木八分書刻於此碑之陰文皆同仲昌元珍子也唐書元珍列傳與崔沔所撰元珍碑皆云漢太尉震十八代孫此碑乃以仲昌爲二十代唐世士人譜牒猶班班可考今元珍仲昌父子碑刻不應差其世次不同如此莫可曉也

唐唐儉碑

右唐唐儉碑云儉字茂約而唐書列傳云字茂系又云男尙識尙豫章公主而唐書於儉傳云名善識於公主傳云名茂識皆其差謬此碑開元中儉曾孫追立距儉

之歿雖已遠然至於名字皆不應有誤可以爲據也

唐龍門西龕石像銘

右唐龍門西龕石像銘禮部員外郎張九齡撰今世所有曲江集無此文惜其殘缺不完也

唐金仙長公主碑

右唐金仙長公主碑徐嶠之撰明皇御書據唐書本傳云太極元年與玉真公主皆爲道士而碑云丙午歲度爲道士蓋神龍二年也此於史學不足道然唐史書事差謬多如此

唐雲麾將軍李秀碑

右唐李秀碑李邕撰并書碑在幽州按明皇以天寶三年改年爲載今此碑元年正月立而稱元載何哉

唐嵩陽觀紀聖德頌

右唐嵩陽觀紀聖德頌天寶中明皇命方士鍊丹於此觀李林甫獻頌稱述功德焉天寶之政荒淫敗度而明皇區區方鍊丹以斬長生豈不可笑乎

唐駙馬都尉豆盧建碑

右唐豆盧建碑云建其先慕容氏前燕枝族也九世祖

結一盧宋氏贖餘叢書

萇在魏賜姓豆盧氏封北地王按元和姓纂云慕容運孫北地王精之後魏道武賜姓豆盧氏精生醜醜曾孫萇生甯而北史甯傳云甯曾祖勝以燕皇始初歸魏授長樂郡守賜姓焉唐距北朝未遠氏族書完備士大夫人人能知其得姓之自今碑與北史姓纂所載不同如此皆莫可考

唐陳隱王祠堂記

右唐陳隱王祠堂記張謂撰按明皇以尹喜舊宅得靈符遂改元天寶此記云寶符見之二載者天寶二年也

其末又云龍會甲申海寇吳令光入臣之歲者據紀年通譜天寶三載歲次甲申蓋天寶二年蘄縣令修完祠堂至明年謂始爲記文爾又按唐書帝紀天寶二年十月二月海賊吳令光寇永嘉郡明年河南尹裴敦復晉陵太守劉同昇南海太守劉巨鱗討之閏月令光伏誅今此記乃云令光入臣而明皇實錄亦止言敦復等討令光平之不言其伏誅不知唐史何所據也豈令光旣降而殺之歟不然唐史誤矣

唐崔潭龜詩

縮一廬朱氏臆餘叢書

右唐崔潭龜詩蔡有鄰小字八分書歐陽公稱之以謂與三代彝鼎銘無異而元祐閒守京兆者取其石爲柱礎世遂不復傳可惜也

唐貞一先生廟碣

右唐貞一先生廟碣貞一先生者司馬承禎也按新舊唐史及諸書皆云承禎字子微今此碑乃云尊師諱子徽字承禎初莫能曉後因見崔尙所撰天台柏觀碑乃言師名承禎一名子微云

唐陳留尉劉飛造像記

右唐陳留尉劉飛造像記史惟則小字八分書按封演
聞見記云玄宗常幸驪山登朝元閣命羣臣賦詩正字
劉飛詩最清拔特蒙激賞右相李林甫怒飛不先呈已
出爲一尉而卒士子冤之今此記有云頃校文金殿廣
歌柏梁叨沐錦衣之賜遂有長沙之役又云聖恩廣被
移官大梁如此則演所記爲不誣矣林甫妒賢嫉能出
於天資飛以一詩之善遂遭遠謫其險復如此記在洛
陽龍門山字畫甚工而世頗罕傳

唐棣王珍墓誌

結一廬宋氏贍餘叢書

右唐棣王珍墓誌按唐史棣王珍坐厭魅囚於鷹狗坊
以憂卒而誌云終於咸甯縣興甯里十六王之藩邸史
云寶應元年詔復珍王爵而誌云存王削官蓋珍初未
嘗奪王爵疑寶應詔書特還其官爾

唐金城寺放生池碑

右唐金城寺放生池碑書撰人姓名皆已殘缺據田槩
京兆金石錄以爲韓擇木書豈當槩爲錄時尙完好可
讀乎其字畫奇偉非擇木不能爲也

唐多寶塔感應碑

右唐多寶塔感應碑岑勛撰顏真卿書多寶塔者僧楚金所造楚金嘗寫法華經千餘部置塔中今猶有存者余於士大夫家數見之余亦得其一卷乃乾元二年肅宗所造卷首佛像絹素畫跡尙如新也

唐滎陽王妣朱氏墓誌

右唐朱氏墓誌韓擇木書擇木以八分名家石刻存者尙多而此誌獨爲正書筆法清勁可愛擇木正書見於世者惟此爾

唐武部尙書楊珣碑

右唐楊珣碑按唐書宰相世系表以珣爲友諒子今碑乃云志謙子疑史誤珣楊國忠父也故_⑤宗親爲製碑其末盛稱楊國忠之美云我有社稷爾能衛之我有廊廟爾能宰之叶和九功九功惟序平章百姓百姓昭明其語可謂褒矣豈所謂臨亂之主各賢其臣者乎碑天寶十二載建蓋後十二年祿山起兵又一年國忠被戮矣

唐宇文灝山陰述

右唐宇文灝山陰述杜陵史懷則書懷則與史惟則同時必其兄弟也惟則以八分著名懷則之書蓋不減惟

則而初不見稱於當時者豈非其位不顯乎以此知士負其藝能或以垂名於不朽或遂湮沒而無聞者蓋亦有幸有不幸也若懷則之書非見錄於予則遂泯沒於後世矣

唐永陽郡太守姚奕碑

右唐姚奕碑奕崇子也新唐史云崇諡文獻而此碑及張說所撰崇碑皆云諡文貞蓋崇父懿已諡文獻父子罕有同諡者當以碑爲正

唐雲門山投龍詩

右唐雲門山投龍詩北海太守趙居貞撰序言天寶_玄默歲下元日居貞投金龍環壁於此山有瑞雲出于洞中有聲云皇帝壽一萬一千一百歲蓋天寶中_玄宗方崇尚道家之說以祈長年故當時諂諛矯妄之徒皆稱述奇怪以阿其所好而居貞遂刻之金石以重欺來世可謂愚矣

唐志歸臺銘

右唐志歸臺銘集古錄云此銘及孔子廟城隍神記三碑並在縉雲其篆刻比陽冰平生所篆最細瘦世言此

石皆活歲久稍生刻處幾合故細者恐無是理果若爾
更加以歲月則遂無復有字矣此數碑皆陽冰在肅宗
朝所書是時年尙少故字畫差疏瘦至大_麻以後諸碑
皆暮年所篆筆法愈_淳勁理應如此也

唐渭南令路公遺愛表

右唐路公遺愛表蘇源明撰新唐史列傳云路嗣恭字
懿範今此碑乃云公名嗣恭字嗣恭然則唐史以爲字
懿範者不知何所據也

唐呂諲祠廟碑

右唐呂諲祠廟碑衛密撰云上元紀歲之明年詔始置
南都以荊州爲江陵府命長史曰尹按元結所撰呂公
表與肅宗實錄皆云上元元年九月改荊州爲南都獨
此碑以爲二年改恐誤

唐呂公表

右唐呂公表元結撰前太子文學翰林院待詔顧誠奢
書杜甫集有贈顧八分文學詩卽誠奢也誠奢八分不
多見余所得者衛密撰呂公廟碑并此表郭英奇郭慎
微碑爲四耳甫詩稱其最工小字而此表字畫甚大尤

壯偉可喜按唐書帝紀及宰相表皆云乾元二年七月辛卯諱以母喪罷十月起復上元元年五月壬子復罷爲太子賓客今此表乃云乾元二年六月丁內憂上元元年七月復罷相月日小不同未知孰是

唐玉真公主墓誌

右唐玉真公主墓誌王縉撰誌云公主法號無上眞字①天寶中更賜號曰持盈而唐史但言字持盈爾誌又云中宗時封昌興郡主睿宗時封昌興公主後改封玉眞進爲長公主唐史但言封崇昌縣主而以昌興爲

結一廬朱氏贖餘叢書

崇昌者皆其闕誤誌又云元年建辰月卒而史以爲卒於寶應中亦非也此於史學皆至淺末不足道然著之要見唐史多謬誤耳

唐京兆尹鮮于仲通碑


右唐鮮于仲通碑顏真卿撰并書仲通以多財結楊國忠薦爲劍南節度使討南詔蠻大敗國忠爲諱之再薦爲京兆尹其始卒無他可稱見於史者惟嘗表請國忠兼領劍南節制及爲國忠頌功德立碑耳魯公爲此碑稱述甚盛以此知碑誌所載是非褒貶果不可信雖魯


公猶爾況他人乎明皇實錄稱仲通以漏禁中語貶邵陽司馬而碑言爲國忠所忌貶小人之交初以利合終以利敗理固然也

唐慧義寺彌勒像碑

右唐慧義寺彌勒像碑李潮八分書潮書初不見重於當時獨杜甫詩盛稱之以比蔡有鄰韓擇木今石刻在者絕少惟此碑與彭元曜墓誌爾余皆得之其筆法亦不絕工非韓蔡比也

金石錄卷之二十七





金石錄卷之二十八

結一廬朱氏贍餘叢書

金石錄卷之二十八

跋尾十八

唐嚴浚碑

唐郭英乂碑

唐潘孝子頌

唐萬年縣令徐昕碑

唐富平尉顏喬卿碣

唐贈太尉李愬碑

唐麻姑仙壇記

唐涼國夫人李氏碑

唐呂府君敕葬碑

唐高陵令李峴遺愛頌

唐宋璟碑

唐宋廣平碑側記

唐放生池碑陰記

唐滑臺新驛記

唐右僕射裴遵慶碑

唐杜濟墓誌

唐重摹延陵季子墓刻

唐顏勤禮碑

唐顏默殘碑

唐開元寺僧殘碑

唐顏魯公與郭僕射書

唐元結碑

唐張九齡碑

唐右神武將軍史繼先墓誌

唐三藏和尚不空碑

唐內侍監魚朝恩碑

唐康日知墓誌

唐工部尙書辛京杲碑

唐茶山詩并詩述

唐崔淙謝廣利方表

唐嚴浚碑

右唐嚴浚碑徐浩書題禮部尙書襄陽縣開國子席某撰而其名殘缺不可辨按天寶中席豫嘗爲此官而碑末有云豫平生交好知其爲席豫撰也唐書列傳云浚華州華陰人而碑云馮翊臨晉人碑文字剝落所存無

幾惟其首大字十二字尙完好筆法奇偉可愛云

唐郭英乂碑

右唐郭英乂碑元載撰按唐書百官志開元中增集賢待制官至永泰時勳臣罷節制無職事皆待制於集賢門凡十三人今此碑載英乂永泰元年實領此職余觀韋述所撰集賢注記開元天寶閒凡隸名於集賢者皆一時文學之選蓋官以待制爲名所以備人主顧問言語侍從之臣也今乃以武夫庸人參於其閒可乎代宗之政其綱紀廢弛者多矣豈特此而已哉

唐潘孝子頌

右唐潘孝子頌崔稱撰孝子字季通與其父良瑗相繼有至行親喪皆廬墓大_麻中宣慰使李季卿以聞有詔褒美墳隴在今中牟縣祥符中章聖皇帝西祀汾陰過之詔有司封其墓且禁樵采云

唐萬年縣令徐昕碑

右唐徐昕碑韓雲卿撰碑云昕爲并州錄事參軍相國姚元之爲法曹笞部人部人誣上反狀天后臨朝方樹

續廬朱氏贍餘叢書

刑威詔公先假風憲然後按詰公表直元之則天大怒將貽鼎鑊終能犯顏曉辨正刑而出果如雲卿所書昕可謂賢矣而唐史不載因爲錄之昕爲有功從弟其忠厚之性固宜異於他人也

唐富平尉顏喬卿碣

右唐顏喬卿碣在長安世頗罕傳或云其石今亡矣有朝士劉繹如者汾陽人家藏漢唐石刻四百卷以余集錄闕此碣也輟以見贈宣和癸卯中秋在東萊重易裝標因爲識之

唐贈太尉李愷碑

右唐李愷碑李紆撰歐陽公集古錄云新唐書列傳載愷十餘子江風涵瀛等同被害惟源彭免據李紆載愷子見於碑者十二人未嘗有源也然則源者史家何從得之據史言源爲司農主簿以碑考之源當爲汝余按穆宗實錄載源事首尾甚詳云愷被害源方八歲爲賊所虜流浪南北展轉人家凡七八年洛陽平父之故吏以金帛贖之歸於近親代宗聞之授河南府參軍自司農主簿棄官寓居洛陽惠林佛寺垂五十年至長慶中

結一廬朱氏贖餘叢書

御史中丞李德裕表薦拜諫議大夫時年八十餘矣竟辭不受又李德裕會昌一品集載薦源表其事皆同然則史不爲無據蓋疑其初名汶後改爲源耳又唐人袁郊撰甘澤謠載源隱居拜官皆同惟書僧圓澤事頗怪誕難信然至其名亦不應謬誤也

唐麻姑仙壇記

右唐麻姑仙壇記顏魯公撰并書在撫州又有一本字絕小世亦以爲魯公書驗其筆法殊不類故正字陳無已謂余嘗見黃魯直言乃慶_曆年一學佛者所書魯直

猶能道其姓名無已不能記也小字本今錄於後使覽者詳其真偽焉

唐涼國夫人李氏碑

右唐涼國夫人李氏碑李郭子儀夫人也碑韓雲卿撰史惟則八分書并篆額文詞頗簡古而字畫工妙可喜或云碑今亡矣故世罕傳雲卿乃退之叔父蝌蚪書後記所謂大_麻中以文詞獨行中朝者

唐呂府君敕葬碑

右唐呂府君敕葬碑呂府君者名惠恭僧大濟之父代

結一盧朱氏贖餘叢書

宗朝元載王縉用事宗尙浮圖之法大濟爲帝常修功德使殿中監故褒贈其父爲兗州刺史官爲營辦葬事爵賞之濫一至於此

唐高陵令李峴遺愛頌

右唐李峴遺愛頌峴嘗任高陵縣令後爲宰相已歿歿後縣令蘇端刻此頌焉碑云曾祖恪封吳王祖琨嗣吳王父禕信安郡王元和姓纂所載亦同而唐書列傳以爲恪之孫誤矣

唐宋璟碑

右唐宋璟碑顏真卿撰并書唐書載廣平六子曰昇尙
渾恕華衡今此碑言公有七子曰復昇尙渾恕延華衡
乃八子也魯公所撰廣平碑側記亦曰公之第八子衡
謫官沙州蓋廣平實有八子唐書闕復延二人而此碑
魯公誤書八字爲七耳又碑云廣平自吏部侍郎兼攝
尙書左丞而史不載後自楚州刺史歷魏兗冀三州兼
河北按察使遷幽州都督復爲魏州而史但言歷兗冀
魏三州刺史河北按察使進幽州都督而已史又載廣
平爲廣州都督時郡人爲璟立遺愛頌璟上疏辭讓有

結一廬朱氏贖餘叢書

詔許停而碑乃云燕公張說嘗爲碑頌今燕公集中實
有此文豈已爲文而未嘗刻石歟

唐宋廣平碑側記

右唐宋廣平碑側記顏魯公撰載廣平任御史時持服
於沙河縣屬突厥寇趙定州河朔兇懼邢州刺史黃文
軌投艱於公公以父母之邦金革無避及賊至城下公
爲曉陳禍福其徒素聞公威名者相率而去之開元末
安西都護趙含章冒于貨賂多以金帛賂朝廷之士九
品以上悉皆有名後節度范陽事覺有司以聞(玄)宗將

加黜責公一無所受乃進諫焉(玄)宗納之遂御花萼樓一切釋放舉朝皆謝公衣冠儼然獨立不拜翌日(玄)宗謂公曰古人以清白遺子孫今卿一人而已公曰含章之賄偶不及臣門非不受也(玄)宗深嘉之又云公第八子衡因謫居沙州參佐戎幕土番入寇陷于賊庭素聞太尉名德曰唐天子我之舅衡之父舅賢相也其可留乎大(麻)十一年以三百騎盡室護歸此皆廣平逸事有以見其清德冠當世威名動夷狄如此而新舊史皆不載故併錄之於此碑覽者得詳焉

結一廬朱氏贖餘叢書

唐放生池碑陰記

右唐放生池碑陰記唐自天寶以後紀綱廢壞職官之濫不可勝載此記具列當時僚屬名氏凡團練副使別駕四人同團練副使一人長史三人司馬三人錄事參軍三人司功司倉司兵皆一人司法司戶皆三人司田司士皆二人參軍四人烏程縣令一人丞三人主簿一人尉四人長城縣令一人丞三人主簿一人尉五人安吉縣令一人攝令一人丞二人主簿一人尉六人武康縣令二人丞三人主簿二人尉四人德清縣令一人丞

二人主簿一人尉三人一郡而吏員猥多如此然史不能盡記故詳錄之於此焉

唐滑臺新驛記

右唐滑臺新驛記李勉撰李陽冰篆其陰有銘歐陽公云不知作者為誰余嘗考之乃舒元興玉筯篆志後贊也其文載於唐文粹及元輿集中歐陽公偶未嘗見之爾

唐右僕射裴遵慶碑

右唐裴遵慶碑唐書列傳載遵慶所歷官甚簡略以碑

結一廬朱氏賡餘叢書

考之其尤著者自吏部郎出為濛陽太守貶符陽郡徵拜禮部郎中而史不載肅宗朝拜給事中累遷尚書右丞兵部戶部侍郎再授吏部而史但言為吏部侍郎而已又史云遵慶薨時年九十餘碑云年八十五碑云遵慶諡貞孝而史無之皆其闕誤也

唐杜濟墓誌

右唐杜濟墓誌但云顏真卿撰而不云書歐陽文忠公以謂非魯公不能為也蓋世頗以為非顏氏書更俟識者辨之余觀此誌字畫奇偉決非他人可到歐陽公信

小字麻姑仙壇記以爲真蹟而尙疑此誌何哉

唐重摹延陵季子墓刻

右吳季子墓刻自唐以來相傳爲孔子書大_麻中蕭定再摹而刻之余覽史記家語及秦漢以前諸子凡孔子與學者談議問答是非褒貶纖悉必載其閒荒誕之說實非出於聖人而附託書之者固有之矣況於季子之賢孔子親銘其墓不應略不見稱於前世至唐而始傳也又碑銘始於東漢孔子時所未有而其字畫乃故爲奇怪以欺眩世俗者非孔子書無疑蓋好事者僞爲耳

結一虛宋氏贖餘叢書

故余特爲錄之以解來者之惑後有博識之士當以余言爲然

唐顏勤禮碑

右唐顏勤禮碑魯公撰并書元祐閒有守長安者後圃建亭榭多輦取境內古石刻以爲基址此碑幾毀而存然已磨去其銘文可惜也

唐顏默殘碑

右唐顏默殘碑者初潁川人家以其石爲馬臺皇祐中王回深父之弟罔容季見而識其爲魯公書因模本以

傳深父爲文以記之默仕晉爲汝陰太守故大_麻中魯公追建此碑於汝陰焉

唐開元寺僧殘碑

右唐開元寺僧殘碑雖書撰人姓名殘缺然以其字畫驗之爲顏魯公書無疑也初

仁宗朝吳長文參政在京師僦居治地得之當時文士皆爲賦詩今其石尙藏汶上長文家云

唐顏魯公與郭僕射書

右唐顏魯公與郭僕射書僕射郭英乂也魯公於座位

結一廬朱氏贖餘叢書

高下小有失當猶力爭如此使之立朝其肯逢君之惡乎

唐元結碑

右唐元結碑顏魯公撰并書按唐書列傳結後魏常山王遵十五世孫而碑與元氏家錄序皆云十二世蓋史之誤又碑與元和姓纂皆云結高祖名善禕而家錄作善禕未知孰是也

唐張九齡碑

右唐張九齡碑徐浩撰并書歐陽公集古錄云按唐書

列傳所載大節多同而時時小異碑長慶中立而公薨
在開元二十八年至長慶三年實八十四年所傳或有
同異至於年壽官爵子孫宜不謬當以碑爲是今考之
浩撰碑時爲嶺南節度使在大麻間距曲江之卒未遠
至長慶中其家始刻石耳劉禹錫讀曲江集詩序以謂
曲江燕翼無似終爲餒魂而碑載公嗣子拯孫藏器碑
後又載曾孫敦慶玄孫景新景重然則曲江爲有後矣
不知禹錫何所據乎碑又云公一名博物而史不載

唐右神武將軍史繼先墓誌

結一盧朱氏廣餘叢書

右唐史繼先墓誌徐浩撰云公諱繼先字繼先夏后氏
之苗裔殷時遷於北土曾祖牟雨可汗祖墨啜可汗諱
瓌父墨特勒諱逾輪肇歸皇化封右賢王又云繼先玄
宗時爲左金吾衛大將軍酒泉郡太守河西節度副使
肅宗初知神武軍事賜姓史氏其後爲右神武將軍封
潁國公卒於建中元年按唐書突厥傳載墨啜子孫事
甚略粗可見者云命默啜子左賢王墨特勒討毗伽可
汗其歸朝及繼先賜姓等事史皆無之又史云默啜而
墓誌作墨史云墨特勒爲左賢王而墓誌作右賢王皆

當以墓誌爲據元和姓纂紀史氏亦不載繼先名姓故
詳錄之以裨唐史及姓纂之闕漏云

唐三藏和尚不空碑

右唐不空碑唐自明皇以後職官不勝其濫下至佛老
之徒亦皆享高爵重祿故不空始爲特進大鴻臚封肅
國公既歿又贈司空於乎名器之輕一至於此昔舜命
伯禹作司空與是異矣

唐內侍監魚朝恩碑

右唐魚朝恩碑吳通玄撰通微書朝恩雖以譴死然其

祐一廬朱氏贖餘叢書

徒如竇文場焦奉超猶居中用事故德宗朝詔爲立碑
通玄兄弟於陸贄謗毀詆排無所不至至爲朝恩碑則
稱頌功德如此可以見其爲人矣

唐康日知墓誌

右唐康日知墓誌李紱撰唐書日知傳云祖植開元中
爲左武威大將軍而誌云祖禕不仕傳云日知終晉絳
節度使而誌云卒於左威衛上將軍傳云累加檢校尙
書左僕射贈太子太師而誌云爲檢校兵部尙書其卒
乃贈僕射紱與日知同時人墓誌所書宜得其實也

唐工部尙書辛京杲碑

右唐辛京杲碑按元和姓纂載辛氏云懷節生言爲都水使者言生雲京京杲而碑乃云懷節生思廉爲左驍衛大將軍公卽大將軍之愛子金城郡王之從父弟新史所書亦同金城郡王卽雲京也然則姓纂以京杲爲言之子雲京之同父弟誤矣

唐茶山詩并詩述

右唐袁高茶山詩并于頔撰詩述李吉甫撰碑陰記其兩卷湖州歲貢茶高爲刺史作此詩以諷高恕己孫也

結一廬朱氏曠餘叢書

貞元中德宗將起盧杞爲饒州刺史高任給事中爭甚力於是止用杞爲上佐德宗猜忌刻薄出於天資信任盧杞幾亡天下奉天之圍賴陸贄之謀以濟杞之貶黜迫於公議然終身眷眷不能忘於贄則一斥不復其奔走播遷而不亡者豈非幸歟非高等力排其姦則復任用杞未可知也唐史稱高代宗時累遷給事中建中中拜京畿觀察使坐累貶韶州長史復拜給事中吉甫爲碑陰述高所歷官甚詳云大_麻中從其父贊皇公辟爲丹陽令再表爲監察御史浙西團練判官德宗嗣位累


遷尙書金部員外郎右司郎中擢御史中丞爲杞所忌
貶韶州長史尋刺湖州收復之歲徵拜給事中以卒然
則高代宗朝未嘗爲給事中德宗朝未嘗拜京畿觀察
使其貶韶州時實爲中丞而其爲中丞與湖州刺史傳
皆不載今并著之以證唐史之誤

唐崔淙謝廣利方表

右唐崔淙謝廣利方表德宗貞元中自著方書號貞元
廣利方頒之郡國淙時爲同州上表稱謝德宗信任姦
臣毒流天下而區區欲以醫方救民疾苦可謂婦人之

仁矣

金石錄卷之二十八



金石錄卷之二十九

跋尾十九

結一盧朱氏贍餘叢書

唐義興縣重修茶舍記

唐昭義軍節度使王虔休碑

唐顏杲卿碑


唐乘廣禪師碑

唐般舟和尚碑

唐韓退之題名

唐國子助教薛公達墓誌

唐虞城令李公去思頌



唐贈吏部尚書武就碑

唐彌陀和尚碑

唐魏博田緒遺愛碑

唐右僕射裴耀卿碑

唐劉統軍碑

唐興元節度使裴玢碑

唐贈司空于萑碑

唐左常侍薛萃碑

唐呂元膺碑

唐檢校太子少保田公碑

唐昭義軍節度使辛秘碑

唐黃陵廟碑

唐贈太保李良臣碑

唐絳守居園池記

唐柳州井銘

唐澠州刺史高德政碑

唐西平王李晟碑

唐烏重胤碑

結一廬朱氏臚餘叢書

唐李祐墓誌

唐令狐公先廟碑

唐殿中侍御史韋翊墓誌

唐義興縣重修茶舍記

右唐義興縣重修茶舍記云義興貢茶非舊也前此故御史大夫李栖筠實典是邦山僧有獻佳茗者會客嘗之野人陸羽以爲芬香甘粹冠於它境可薦於上栖筠從之始進萬兩此其濫觴也厥後因之徵獻寔廣遂爲任土之貢與常職之邦侔矣每歲選匠徵夫至二千

結一廬朱氏贖餘叢書

餘人云余嘗謂後世士大夫區區以口腹玩好之獻爲愛君此與宦官宮妾之見無異而其貽患百姓有不可勝言者如貢茶至末事也而調發之擾猶如此況其甚者乎羽蓋不足道於乎孰謂栖筠之賢而爲此乎書之可爲後來之戒且以見唐世義興貢茶自羽與栖筠始也

唐昭義軍節度使王虔休碑

右唐昭義軍節度使王公碑其名已殘缺以事考之蓋王虔休也與唐書列傳所載官爵行治多同惟碑云贈

右僕射傳爲左僕射小失不足道而碑與傳皆云虔休汝州梁縣人元和姓纂以爲范陽人非也

唐顏杲卿碑

右唐顏杲卿碑真卿撰元和中舊石剝缺其甥盧佐元重書而刻之舊唐史言杲卿旣殺蔣欽湊等立宗知之加杲卿衛尉卿兼御史大夫以袁履謙爲常山太守杲卿爲司馬今以碑考之乃進兼中丞追赴京而以賈深爲司馬新史所書亦同蓋舊史之謬碑又言公初被害懸首於右金吾街樹有張湊者收其髮謁立宗俄見夢

廬朱氏贍餘叢書

云禦捍處多兵馬少立宗哭而設祭焉後湊以髮至夫人疑之憑牀而哭忽聞聲如鞭牀者髮箱跳而前夫人方駭信之其事甚怪而舊史不書新史所載亦簡略杲卿忠義之節貫金石其死宜不昧而魯公之語可信無疑故盡錄其事於此

唐乘廣禪師碑

右唐乘廣禪師碑劉禹錫撰初余爲金石錄頗以唐賢所爲碑板正文集之誤禹錫之文所錄才數篇最後得此碑以校集本是正者凡數十字以此知典籍歲久轉

寫脫誤可勝數哉

唐般舟和尚碑

右唐般舟和尚碑柳宗元撰并書子厚頗自矜其書然亦不甚工今見于世者惟此與彌陀和尚碑爾雖字畫小大不同然筆法絕相似歐陽公以爲不類又疑他人借子厚之名者非也

唐韓退之題名

右唐韓退之題名在嵩山天封觀柱蓋退之自書又一本與石洪等題名在洛陽福先寺乃同遊者所書爾世

結一廬朱氏贖餘叢書

閒又有退之與大顛書乃國初一學佛者僞作而歐陽公集古錄以爲非僞永叔平生爲文宗師退之且力詆釋氏而獨信此書何哉

唐國子助教薛公達墓誌

右唐薛公達墓誌韓退之撰以昌黎集本校之頗不同皆當以石本爲是今略舉數處集本云曾祖曰希莊父曰播而闕其祖石本乃云祖曰元暉果州流溪縣丞贈左散騎常侍集本云君執弓腰二矢挾一矢而興而石本作指一矢以興集本云遺言曰以公儀之子爲己後

而石本作以公儀之子己已後我蓋其小字也如此類甚眾略舉數處要知石刻可貴爾

唐虞城令李公去思頌

右唐虞城令李公去思頌李白撰王適書碑側題云元和四年二月重篆蓋適不與白同時此碑後來追建爾歐陽公集古錄云適在陽冰前者誤也

唐贈吏部尙書武就碑

右唐武就碑就元衡父也元和姓纂載平一四子集備就登備生元衡今此碑與唐書宰相世系表皆以元衡

結一廬朱氏贖餘叢書

爲就子姓纂元和中修是時元衡爲宰相不應差其世次豈余家所藏本偶爾脫誤乎當俟別本校正

唐彌陀和尙碑

右唐彌陀和尙碑柳宗元撰并書以集本校之不同者十餘字皆當以碑爲正

唐魏博田緒遺愛碑

右唐魏博田緒遺愛碑裴均撰張弘靖書政和中與柳公權所書何進滔德政碑俱爲大名尹所毀

唐右僕射裴耀卿碑

右唐裴耀卿碑許孟容撰宋次道春明退朝錄載皇祐中王沂公曾之弟子融侍郎守河中還以唐明皇所題裴耀卿碑額上之

神宗遂御篆

賜沂公碑額曰旌賢今此碑元和中立文與額皆歸登書非明皇所題疑子融所上乃明皇書裴光庭碑爾耀卿光庭二碑皆在絳州也又按新唐史列傳云耀卿字煥之宰相世系表作渙之而碑乃字子渙傳云耀卿守真次子而碑乃第三子皆史家之謬

結一廬朱氏贖餘叢書

唐劉統軍碑

右唐劉統軍碑字畫雖殘缺猶歷歷可辨以昌黎集本校之時有異同皆當以碑爲是惟敘其世系不同則疑碑之誤集本云公曾祖考爲朔州守祖令太原再世北邊樂其高寒棄楚不還逮於公身三世晉人而墓誌亦云曾大父諱承慶朔州刺史大父巨敖爲太原晉陽令遂著籍太原之陽曲今此碑乃云考令太原又云再世晉人且碑旣言陽曲之別縣公祖遷則其爲晉人非再世明矣余故曰石本誤也碑當時所立其諸子皆在不

應差其世次而錯謬如此莫可曉也

唐興元節度使裴玠碑

右唐裴玠碑晉公裴度撰碑已斷裂其姓氏摩滅不可識云公諱玠字連城以事考之蓋裴玠也玠元和中爲興元節度使以疾歸朝卒新舊史皆有傳舊史云五代祖疏勒國王綽武德中來朝授鷹揚大將軍天山郡公因留爲京兆人而新史乃云名糾今碑所載與舊史同不知新史何所據而改爲糾乎疑傳寫誤耳又新舊史皆云綽玠五世祖而碑云高祖亦當以碑爲正

結一廬朱氏贖餘談書

唐贈司空于夔碑

右唐于夔碑集古錄載夔碑云盧景亮撰今此碑乃云張躬撰疑夔有兩碑景亮所撰余錄中偶無之當俟訪求

唐左常侍薛萃碑

右唐薛萃碑唐史列傳云萃父順爲奉先尉而此碑及元和姓纂皆云名順先蓋史誤

唐呂元膺碑

右唐呂元膺碑舊唐史云元膺字景文新史云字景夫

而碑乃字孟澹新舊史皆云元膺自御史中丞拜岳鄂
觀察使而碑乃爲岳鄂觀察兼中丞爾其卒也舊史云
諡曰憲而碑作獻皆當以碑爲據

唐檢校太子少保田公碑

右唐檢校太子少保田公碑李宗閔撰文字殘缺以事
考之蓋田弘正之兄融碑也弘正帥魏博詔以融爲相
州刺史使之相近唐史稱弘正幼孤事融甚謹軍中嘗
分曹習射弘正聯中融怒退扶之故當田季安猜暴時
能自全及爲軍中推迫融不悅曰爾竟不自晦取禍之

結一廬朱氏腹餘叢書

道也其後弘正與其子布皆被禍如融言融兄弟父子
出於軍旅其智略皆過人如弘正布之忠義融之先見
眞一代豪傑也碑爲篆字題嵩山布衣書而名姓磨滅
不可識其筆跡頗佳

唐昭義軍節度使辛秘碑

右唐辛秘碑與新唐史所載事跡大略皆同惟碑與舊
史皆云登五經開元禮科而新史云舉明經碑云其卒
贈右僕射而新舊史皆作左僕射爾又舊史云諡曰昭
而新史云諡曰肅後更諡懿碑不載其諡莫知孰是也

唐黃陵廟碑

右唐黃陵廟碑碑四面皆有字今其兩面字多處已磨滅不可讀此本蓋七八十年前舊物字畫完好可寶也今世所傳退之集多爲人妄加讐校而此碑人家尙時有之故訛謬爲少然退之自潮移袁入爲國子祭酒實三年而碑云三十年蓋書碑者誤爾

唐贈太保李良臣碑

右唐李良臣碑良臣李光顏之父也碑李宗閔撰文詞爾雅可喜宗閔牛僧孺皆一代奇才而自陷朋黨惜哉

結一廬朱氏贖餘叢書

唐絳守居園池記

右唐絳守居園池記樊宗師撰昔之爲文者雖務爲新語然未嘗有意於求奇也宗師之文乃故爲險怪必使人不可曉而後已此豈作者之體哉

唐柳州井銘

右唐柳州井銘柳宗元撰沈傳師書字畫頗不工疑後人僞爲然以子厚集本校之不同者數字此本爲善又恐工人摹刻不甚精好爾更俟識者辨之

唐澱州刺史高公德政碑

右唐澠州刺史高德政碑王起撰按唐書地理志元和十二年以郾城上蔡西平遂平四縣置澠州長慶元年州廢今碑後題長慶而其下缺殘當爲元年蓋是年州遂廢矣高公者名承簡崇文之子爲裴度牙將後至邠甯節度唐史有傳

唐西平王李晟碑

右唐李晟碑裴度撰碑載西平子十二人愿聰摠憑憲憲愨聽基愨唐史宰相世系表所書亦同而新舊史列傳皆云晟有十五子舊史云佗佗偕無祿蚤世豈

結一廬朱氏贖餘叢書

以佗等蚤世故碑不載歟又李石撰李聽碑云西平有子十六人疑更有未名而卒者爾元和姓纂載西平子十人以碑校之姓纂缺聰摠憑愨四人而怵應二子墓碑舊史皆無之又其倫次差謬亦當以碑爲正

唐烏重脩碑

右唐烏重脩碑新唐史列傳云重脩爲橫海節度使討王廷湊久不進兵穆宗以爲觀望詔杜叔良代之以重脩爲太子太保長慶末以檢校司徒同中書門下平章事爲山南西道節度使召至京師改節天平軍文宗初

眞拜司徒今以碑考之重膺爲橫海節度也長慶元年徙爲山南西道周歲徵入改天平軍四年就拜太子太保文宗踐極眞拜門下平章事頃之同中書爲司徒餘如故蓋重膺之罷橫海卽移鎮興元未嘗拜太子太保而其爲太保實帥天平又其帥興元時未嘗兼宰相至文宗卽位乃拜爾舊史與文宗實錄所書略同皆可以正新史之失

唐李祐墓誌

右唐李祐墓誌庾敬休撰新唐書列傳云李祐爲夏綏

結一廬朱氏賸餘叢書

銀節度使徙涇原討李同捷也改滄德景節度累遷檢校尙書左僕射董重質之貶未幾轉太子少詹事隸武備軍遷左神武將軍累擢左右神策行營劍南西川節度復云厯帥夏綏銀終右龍武統軍贈尙書右僕射其所書首尾顛倒今以墓誌考之祐以平蔡功超授左神武將軍從徐州李愬平李師道遷左金吾衛將軍帥綏銀夏遷戶部尙書兼左金吾衛大將軍遂爲齊德滄景等州節度使以卒其所厯官止此矣蓋未嘗爲少詹事帥涇原領劍南節制也不知史何所依據又誌云卒於

三十九
滄景而傳言終龍武統軍誌云贈司徒而傳言贈僕射亦當以誌爲是祐之爲吳元濟將也據李愬傳言吳秀琳之降爲愬策曰必破賊非李祐不可祐賊健將也守興橋柵其戰常易官軍愬候祐穫于野遣史用誠以壯騎三百伏其傍祐果輕出遂爲所禽今誌乃言祐潛布款誠於愬且曰某以某日歸命其就執也願得傷一支以爲解不然妻子之在賊城無遺類矣愬許之洎至唐州同執者十二人命斬於牙門外次至祐大叫謂愬曰公背初約邪今淮蔡未平不宜誅壯士愬乃釋之自取

結一盧永氏贈餘叢書

藥封其臂分衣服飲食與語終日卽署爲都知兵馬使二說不同未知孰是也

唐令狐公先廟碑

右唐令狐公先廟碑劉禹錫撰集本云躬若奉盈而碑本躬作躬按史記周公世家云躬躬然如畏徐廣曰躬躬謹敬貌也出三蒼後人不知躬字所出遂改爲躬誤矣其他異同尙多不盡錄也

唐殿中侍御史韋翊墓誌

右唐韋翊墓誌劉禹錫撰世所傳禹錫文集無此誌蓋

禹錫集本四十卷今亡其十卷墓誌皆闕非獨此一篇也翊有子詢仕爲湖南觀察使舊史有傳新史無之墓誌云翊父幼卿而傳作台卿墓誌云翊官終殿中侍御史而傳作侍御史皆非也

金石錄卷之二十九

金石錄卷之三十

跋尾二十
唐五代

唐義陽郡王苻璘碑

唐贈太尉王智興碑

唐丞相崔羣碑

唐何進滔德政碑

唐李聽碑

唐贈太師崔倕碑

唐相國李涼公碑

唐牛僧孺碑

唐太子太傅劉沔碑

唐醉吟先生傳并墓碑

唐贈太尉李固言碑

唐吏部尚書高元裕碑

唐贈司徒薛平碑

唐起居郎劉君碑

唐贈禮部尚書許康佐碑

唐潛溪記

唐贈司空孔岑父碑

唐千字文

唐瘞鶴銘

唐冬日陪羣公泛舟詩

唐題阮客舊居詩

唐遺教經

唐冰清琴銘

唐中書舍人王無兢碑

後唐汾陽王真堂記

漢重修高祖廟碑

結一廬朱氏贖餘叢書

南唐紫極宮石磬銘

周文宣王廟記

日本國誌

唐義陽郡王苻璘碑

右唐苻璘碑按唐書列傳璘姓苻而碑作苻以姓氏書考之瑯琊苻氏出於魯頃公之後公雅爲秦符節令因以苻爲氏而武都苻氏出於有扈之後爲啟所滅奔西戎代爲氏酋本姓蒲至苻堅以背有文改焉今此碑以璘爲苻氏又云其先瑯琊人皆不可知然按璘與弟璠

結一廬朱氏贍餘叢書

皆封邑於瑯琊豈書碑者誤以苻爲苻其家出於武吏不知是正乎

唐贈太尉王智興碑

右唐王智興碑裴晉公撰智興出於戎伍無他才能其爲將帥雖有破李師道李芥李同捷之功然在徐州拔扈難制逐崔羣侯弘度剽奪貢物重斂以結權倖其功不足掩過晉公爲此碑可謂過其實矣

唐丞相崔羣碑

右唐崔羣碑裴晉公撰劉禹錫書字畫訛缺處多其可

考者羣爲武甯軍節度使檢校禮部尙書而唐史本傳作兵部其自荆南節度使召拜檢校左僕射太常卿遂爲吏部尙書以卒而傳但云召拜吏部尙書而已皆當以碑爲正羣在憲宗朝號稱賢相是時皇甫鎛方有寵羣力排其姦且爲憲宗陳開元天寶治亂所以分者其語激切然憲宗竟逐羣而相鎛夫以羣之賢憲宗之明然讒間一入且猶不免自古君臣之際能保終始者顧不難哉

唐何進滔德政碑

結一廬朱氏賡餘叢書

右唐何進滔德政碑進滔事蹟固無足取而柳公權書法爲世模楷此碑尤爲雄偉政和中大名尹建言磨去舊文別刻新製好古者爲之歎惜也

唐李聽碑

右唐李聽碑與唐史所載事蹟多同惟聽罷魏博節度使碑言爲太子太師而傳作少師小誤爾

唐贈太師崔倕碑

右唐贈太師崔倕碑據新唐史倕子邠傳云倕位吏部侍郎今以碑考之倕仕至檢校吏部郎中兼御史中丞

爾蓋傳誤也

唐相國李涼公碑

右唐李涼公碑李德裕撰文字殘缺不可盡識按新唐史列傳載石所歷官甚略其最著者嘗兼御史中丞充巡邊使又自給事中遷京兆尹史皆不載其爲荆南節度也史云讓中書侍郎換檢校兵部尙書會昌三年檢校司空徙節河東而碑云初加檢校尙書武宗承統首讓中書侍郎就遷檢校右僕射餘如故皆當以碑爲正

唐牛僧孺碑

結一廬朱氏贖餘叢書

右唐牛僧孺碑李珣撰據碑云僧孺自襄陽節度使降授太子少師遷檢校司徒兼太子太保而傳言下遷太子少保進少師碑云宣宗卽位自汝州長史遷太子少保轉少師分司東洛而史但言還爲少師亦不言其爲分司者皆史之缺誤又杜牧撰僧孺墓誌云文宗朝以中書侍郎領平章事而史作門下侍郎亦非也

唐太子太傅劉沔碑

右唐劉沔碑按舊史云沔許州牙將也少事李光顏爲帳中親將元和中討吳元濟有功隨光顏入朝憲宗留

宿衛歷三將軍鹽州刺史天德軍防禦使移振武節度使而碑乃云河北遊至單于都護府謁節度使范希朝希朝署牙門將入右神策軍爲大將累遷大將軍拜涇原節度使移振武蓋沔初未嘗爲許州牙將從李光顏平蔡及爲鹽州刺史天德軍防禦使皆當以碑爲正至新史所書悉與碑合疑史官嘗得此碑以訂舊史之失云

唐醉吟先生傳并墓碑

右唐醉吟先生傳并墓碑舊唐史云居易以大中元年

結一廬朱氏贍餘叢書

卒年七十五而新史云卒於會昌六年年六十五今碑所書與新史合又舊史書居易拜官歲月亦多差謬不合小失不足道故不錄

唐贈太尉李固言碑

右唐李固言碑按新唐史列傳云固言自河中節度使以疾爲太子少師遷東都留守宣宗卽位遷右僕射後以太子太傅分司東都卒以碑考之其初爲東都留守數月罷以本官分司而史不書宣宗時爲僕射再遷檢校司徒東都留守而史亦不書其卒也史云年七十八

而碑云年七十六亦當以碑爲據也

唐吏部尙書高元裕碑

右唐高元裕碑據舊史元裕列傳及此碑皆云元裕祖名魁而新史宰相世系表獨作彪蓋誤

唐司徒薛平碑

右唐薛平碑據唐史列傳平爲平盧軍節度使就遷檢校右僕射封魏國公寶麻初入朝拜檢校司空爲河中節度使進檢校司徒更封韓以碑考之自平盧拜僕射進封韓國公敬宗卽位拜檢校司空寶麻元年朝京師

結一廬朱氏贍餘叢書

換左僕射兼戶部尙書踰月復爲檢校司空節度河中
文宗卽位就加檢校司徒蓋未嘗封于魏而敬宗時入
朝所拜官吏亦不載皆其闕誤也碑言平罷滑臺爲金
吾嘗見二神人白天執節降庭中呼曰薛平還汝舊節
公俯伏拜受及再爲滑臺以爲當之矣後爲平盧乃驗
焉其事甚怪而唐史無之豈非妄歟

唐起居郎劉君碑

右唐起居郎劉君碑劉氏世墓在彭城叢亭里紹聖閒
故陳無己學士居彭城以書抵余曰近得柳公權所書

劉君碑文字摩滅獨公權姓名三字煥然明白余因求得之碑殘缺然可識者猶十三四不忍棄故錄之

唐禮部尙書許康佐碑

右唐許康佐碑康佐事文宗爲翰林侍講學士文宗嘗讀春秋問康佐闍寺事康佐顧望不敢對後以問李訓訓遂進翦除之計康佐知帝指因稱疾罷爲兵部侍郎甘露之禍李訓實啟之其狂率固有罪然康佐以儒學侍講獨備顧問而嘿然不對至辭位而去亦可謂全軀保妻子之臣矣

結一廬朱氏贖餘叢書

唐潛溪記

右唐潛溪記杜宣猷撰潛溪者在洛陽龍門山側地有溪谷之勝舊爲宰相李藩別墅宣猷購得之加葺治焉唐史宦者傳載宣猷爲福建觀察使中官多閩人宣猷每歲時遣吏爲上冢當時號爲敕使墓戶用此除宣城夫疏泉石種樹藝艸窮登覽游觀之勝此山林獨往之士遺世棄俗者之所樂也如宣猷者區區以諂諛附會盜竊顯榮而欲擅山林獨往之樂是可笑也

唐贈司空孔岑父碑

右唐孔岑父碑鄭綱撰歐陽公集古錄云碑有子五人載戮戮戮按新唐書宰相世系表岑父六子戮之下有威表據孔氏家譜譜其家所載碑文鄭綱撰綱自言與孔氏有世舊作碑時筮等尙在然則譜與碑文皆不應有失而不同者何也余按韓退之爲戮墓誌云公之昆弟五人載戮戮戮公於次爲第二與綱所撰碑正合然則安得復有威乎蓋綱與退之皆當時人所書宜不謬而其家譜乃其後裔追書容有差誤不足怪也

千字文

結一廬朱氏贖餘叢書

右千字文世傳智永書非也蓋智永陳時人而此書虎字民字基字皆闕之以避唐諱乃明皇以後人所書不然筆法本出智永後來臨摹入石爾其間二十八行字畫不類蓋舊本不完國初時人爲補足之云

瘞鶴銘

右瘞鶴銘題華陽真逸撰莫詳其爲何代人歐陽公集古錄云華陽真逸顧況道號余徧檢唐史及況文集皆無此號惟况撰湖州刺史廳記自稱華陽山人爾不知歐陽公何所據也

冬日陪羣公泛舟詩

右冬日陪羣公汎舟詩在潤州瘞鶴銘傍其字畫正同蓋一人所書也題謫丹陽工曹掾而不見其名詩與書皆工然世頗罕傳

唐題阮客舊居詩

右唐題阮客舊居詩小篆書集古錄以爲陽冰作今驗其姓名乃縉雲令李蕃非陽冰也其字畫亦不工蓋陽冰於肅宗上元中嘗令縉雲其篆字石刻尙多有存者故歐陽公亦誤以此詩爲陽冰作爾

結一廬朱氏贖餘叢書

唐遺教經

右唐遺教經國初時人盛傳爲王右軍書惟歐陽公識其非是余家藏金石刻二千卷獨此經最爲舊物蓋先公進士時所蓄爾

唐冰清琴銘

右唐冰清琴銘詞翰皆不俗可喜題曰晉陵子而不著名氏豈非隱者歟琴藏太常寺協律郎陳沂家沂死納于曠中云

唐中書舍人王無競碑

右唐王無競碑無競事迹附見唐書陳子昂傳後以碑考傳頗不合傳言自殿中侍御史徙太子舍人神龍初出爲蘇州司馬貶廣州仇家矯制榜殺之而碑言爲中書舍人卒傳言坐與張易之等交往貶而碑云兩張弄權九有蕩析公黜而無愠皆莫知其孰是據碑言無競無子孫權知萊州刺史姚泖爲買石立碑去無競之歿已遠事得於傳聞未足盡信也無競東萊人墓在掖縣界中云

後唐汾陽王眞堂記

結一廬朱氏贖餘叢書

右後唐汾陽王眞堂記李鶚書鶚五代時仕爲國子丞九經印板多其所書前輩頗貴重之余後得此記其筆法蓋出歐陽率更然審于法度而韻不能高非名筆也

漢重修高祖廟碑

右漢重修高祖廟碑郭忠恕八分書余年十七八時已喜收蓄前代石刻故正字陳無己徐人爲予言豐縣有此碑託人訪求後數年乃得之然字畫頗輒弱余家有忠恕八分書懷嵩樓記墨跡乃其暮年所書筆力老勁非此碑之比亦嘗刻石今錄於此

南唐紫極宮石磬銘

右南唐紫極宮石磬銘徐鍇撰并小篆書鍇與其兄鉉在江南以文翰著名王師南征鍇卒於圍城中鉉隨後主歸朝貴顯以壽終歐陽公集古錄云宋興違命侯來朝二徐皆得爲王臣者誤矣

周文宣王廟記

右周文宣王廟記題縣令郭忠恕撰并書按國史忠恕爲漢湘陰公從事周祖徵爲周易博士國初貶乾州司戶太宗朝復任國子主簿流登州卒不載其嘗爲縣令

結一廬朱氏贍餘叢書

也記云縣在汝水之泃嵩山之陽不知其爲何縣最後題甲寅四月十五日建蓋周世宗顯德元年也或云此記在汝州界中

日本國誥

右日本國誥題康保五年日本在海東自漢以來見于史然與中國不常通宋莒公紀年通譜載其國年號九而獨無康保其後畢仲荀見此誥錄於通譜之末然不知康保是中國何年也余家集古今石刻凡二千卷外國文字著錄獨此而已

金石錄卷之三十

而此碑之其刻也...
 其然與中國...
 其日本國...
 其刻也...
 其甲寅四月...
 其刻也...

後序

東武趙明誠德父家多前代金石刻
 倣歐陽公集古所論以考書傳諸家
 同異訂其得失著金石錄三十卷別
 白牴牾實事求是其言斤之甚可觀
 也昔文籍既繁竹素紙札轉相謄寫
 彌久不能無誤近世用墨版摹印便


於流布而一有所失更無別本是正
然則謄寫模印其為利害之數略相
等又前世載筆之士所見所聞與其
所傳不能無同異亦或有意軒輕情
流事遷則道離失實後學欲窺其罅
搜抉證驗用力多見功寡此讎校之
士抱槩懷鉛所以汲々也昔人欲刊

定經典及醫方或謂經典同異未有
所傷非若醫方能致壽夭陶弘景亟
稱之以為知言彼哉卑陋一至於此
或譏邢邵不善讎書邵曰誤書思之
更是一適且別本是正猶未敢曰可
而欲以思得之其他有如此者惟金
石刻出於當時所作身與事接不容

偽妄皎々可信前人勤渠鄭重以遺
來世惟恐不遠固非以為夸而好古
之士忘寢廢食而求常恨不廣亦豈
專以為玩哉余登泰山觀秦相斯所
刻退而按史遷所記大凡百四十有
六字而差失者九字以此積之諸書
浩博其失胡可勝言而信書之人守

自所見知其違戾猶弗能深攷猥曰
是碑之誤其殆未之思乎若乃庸夫
野人所述其言雖不雅馴則望而知
之直差易耳今德父之藏既甚富又
選擇多善而探討去取雅有思致其
書誠有補於學者亟索余文為序竊
獲附姓名於篇末有可喜於是乎書

政和七年九月十日河間劉跂序



右金石錄三十卷者何趙侯德父
所著書也取上自三代下訖五季
鍾鼎甌鬲盤匱尊敦之款識豐碑
大碣顯人晦士之事蹟凡見於金
石刻者二千卷皆是正譌謬去取
褒貶上足以合聖人之道下足以
訂史氏之失者皆載之可謂多矣

嗚呼自王播元載之禍書畫與胡椒無異長輿元覲之病錢癖與傳癖何殊名雖不同其惑一也余建中辛巳始歸趙氏時先君作禮部員外郎丞相作吏部侍郎侯年二十一在太學作學生趙李族寒素貧儉每朔望謁告出質衣取半千

錢步入相國寺市碑文果實歸相對展玩咀嚼自謂葛天氏之民也後二年出任宦便有飯蔬衣練窮遐方絕域盡天下古文奇字之志日就月將漸益堆積丞相居政府親舊或在館閣多有亡詩逸史魯壁汲冢未見之書盡力傳寫浸覺

後序
五
有味不能自己後或見古今名人
書畫三代奇器亦復脫衣市易嘗
記崇寧間有人持徐熙牡丹圖求
錢二十萬當時雖貴家子弟求二
十萬錢豈易得耶留信宿計無所
出而還之夫婦相向惋悵者數日
後屏居鄉里仰取俯拾衣食有餘

連守兩郡竭其俸入以事鉛槧每
獲一書即同共校勘整集籤題得
書畫彝鼎亦摩玩舒卷指摘疵病
夜盡一燭為率故能紙札精緻字
畫完整冠諸收書家余性偶強記
每餘罷坐歸來堂烹茶指堆積書
史言某事在某書某卷第幾葉子

第幾行以中否角勝負為飲茶先
後中即舉盃大笑至茶傾覆懷中
不得飲而起甘心老是鄉矣故雖
處憂患困窮而志不屈收書既成
歸來堂起書庫大樹簿甲乙置書
冊如要講讀即請鑰上簿關卷帙
或少損污必徵責楷完塗改不復

向時之坦夷也是欲求適意而反
取慘慄余性不耐始謀食去重肉
衣去重采首無明珠翡翠之飾室
無塗金刺繡之具遇書史百家字
不刊缺本不訛謬者輒市之儲作
副本自來家傳周易左氏傳故兩
家者流文字最備于是几按羅列

枕籍意會心謀日往神授樂在色
聲狗馬之上至靖康丙午歲侯守
淄川聞金人犯京師四顧茫然盈
箱溢篋且戀且悵知其必不
為己物矣建炎丁未春三月犇太
夫人喪南來既長物不能盡載迺
先去書之重大印本者又去畫多

幅者又去古器之無款識者後又
去書之監本者畫之平常者器之
重大者凡屢減去尚載書十五車
至東海連艦渡淮又渡江之建康
青州故第尚鎖書冊什物用屋十
餘間期明年春再具舟載之十二
月金人陷青州凡所謂十餘屋者

已皆為煨燼矣建炎戊申秋九月
侯起復知建康府己酉春二月罷
具舟上蕪湖入姑熟將卜居贛水
上夏五月至池陽被
旨知湖州過闕上殿遂駐家池
陽獨赴召六月十三日始負擔
捨舟岸上葛衣岸巾精神如虎目

光爛射人望舟中告別余意甚
惡呼曰如傳聞城中或緩急奈何
戟手遙應曰從衆必不得已先棄
輜重次衣被次書冊卷軸次古器
獨所謂宗器者可自負抱與身俱
存亡勿忘之遂馳馬去塗中奔馳
冒大暑感疾至行在病疴七月

未書報卧病余驚怛念侯性素急
奈何病疢或熱必服寒藥復可憂
遂解舟下一日夜行三百里比至
果大服柴胡黃芩藥瘡且痢危在
膏肓余悲極倉皇不忍問後事八
月十八日遂不起取筆作詩絕筆
而終殊無分香賣屨之戀葬畢余

無所之 朝廷已分遣 六宮又

傳江當禁渡時猶有書二萬卷金石
刻二千卷器皿茵褥可待百客他
長物稱是且又大病僅存喘息事
勢日迫念侯有妹婿任兵部侍郎
從衛在洪州遂遣二故吏先部送
行李往投之冬十二月金人陷洪

州遂盡委棄所謂連艦渡江之書
又散為雲烟矣獨余餘少輕小卷
軸書帖寫本李杜韓柳集世說鹽
鐵論漢唐石刻副本數十軸三代
鼎彝十數事南唐寫本書數篋偶
病中把玩搬在卧内者巋然獨存
上江既不可往又虜勢叵測有弟

近任勅局刪定官遂往依之到
台守已遁之剡出陸又棄衣被
走黃巖雇舟入海犇行朝時駐驛
章安從御舟海道之温又之越庚
戌十二月放散百官遂之衢紹興
辛亥春三月復赴越壬子赴杭先
侯疾亟時有張飛卿學士携玉壺

過視侯便携去其實珉也不知何
人傳道遂妄言有頒金之語或傳
亦有密論列者余大惶惴不敢言
亦不敢遂已盡將家中所有銅器
物欲赴外廷投進到越已 移幸
四明不敢留家中并寫本書寄刻
後官車收叛卒取去聞盡入李將

軍家所謂歸然獨存者無慮十去
五六矣惟有書畫硯墨可五七簾
更不忍置他所常在卧榻下手自
開闔在會稽卜居士民鍾氏舍忽
一夕穴壁負五簾去予悲慟不得
活重立賞收贖後二日鄰人鍾復
皓出十八軸求賞故知其盜不遠

後序
十二
矣萬計求之其餘遂牢不出今知
盡為吳說運使賤價得之所謂歸
然獨存者廼十去其七八所有一
二殘零不成部帙書冊三數種平
平書帖猶復愛惜如護頭目何愚
也耶今日忽開此書如見故人因
憶侯在東萊靜治堂裝卷初就芒

籤縹帶束十卷作一帙每日晚吏
散輒校勘二卷跋題一卷此二千
卷有題跋者五百二卷耳今手澤
如新而墓木已拱悲夫昔蕭繹江
陵陷沒不惜國亡而毀裂書畫楊
廣江都傾覆不悲身死而復取圖
書豈人性之所著生死不能忘之

後序
十三
歟或者天意以余菲薄不足以享
此尤物耶抑亦死者有知猶斤斤
愛惜不肯留在人間耶何得之艱
而失之易耶嗚呼余自少陸機作
賦之二年至過蘧瑗知非之兩歲
三十四年之間憂患得失何其多
也然有之必有無有聚必有散乃

理之常人亡弓人得之又何足道
尚所以區區記其終始者亦欲為
後世好古博雅者之戒云紹興二
年之默歲壯月朔甲寅易安室題
趙德父所著金石錄鈔版於龍
舒郡齋久矣尚多脫落茲幸假
守於邦人張懷祖知縣既得郡

文學山陰王君玉是正且惜夫
易安之跋不附焉因刻以殿之
用尉德父之望亦以遂易安之
志云

開禧改元上巳日浚儀趙不譚
師厚父

金石錄余求之三十年不可得

壬辰冬始遇此善本于

京師如獲寶玉然鈔畢略觀一度
其於集古錄正誤最多誠亦精
審已雖然自昔著書家几塵風
葉之喻前後彼此蓋恆有之不
足恠也吾安得歐陽公集古錄
目洪丞相漢隸釋等書悉集於

此而又有閒暇工夫稍盡心焉
亦平生之一適也漫筆之以俟
成化九年二月朔旦吳郡葉仲
盛甫志

余少見此書於吳純甫家至是
始從友人周思仁借鈔復借葉
文莊公家藏本校之觀李易安

所稱其一生辛勤之力頃刻雲
散可以為後人藏書之戒然余
平生無他好獨好書以為適吾
性焉耳不能為後日計也文莊
公書無慮萬卷至今且百年獨
無恙緡閱之餘手跡宛然為之
敬歎

晉鴻臚成公重墓刻 永甯二年四月一本作二月

後魏齊兗二州刺史傅公碑一本作徐兗

夜郎太守毋稚碑一本作毋

後魏太鴻臚鄭嗣伯碑一本作伯 按隋宋諱故 改為嗣征矣

梁許長史舊館壇碑陶弘景撰 諸道石刻錄云 孫文韜書 按

梁開善寺大法師碑按諸道石刻錄此碑 紹興初為鹵人所焚

後魏兗州太守張猛龍碑按碑額作魯郡 太守非兗州

卷三 目

北齊郁久閭業碑 天保七年八月一本作五月

後周太學生拓拔府君墓志 武帝保定元年十一月一本無武

帝二字

結一廬宋氏贖餘叢書

北齊閻亮造象記 齊武成河清元年九月一本作十九月

北齊權法師碑 河清二年七月一本作九月

北齊邑義人造象記 天統二年七月一本作八月

北齊蒙山碑 天統五年七月一本作三月

隋齊國太夫人楊氏墓志 開皇十年三月一本作二月

隋劉景超造象碑一本作景詔 十本作景詔

隋驃騎將軍楊端墓志 開皇十五年三月一本作二月

隋啟法寺碑一本作起法

隋樂州使君江夏公碑 大業二年十月一本作七月

唐衛尉卿竇慶墓志 貞觀五年七月盧按跋尾 作四年

唐正解寺碑 李百藥撰百均作伯誤下盡同 今按明鈔本改正

隋益州長史裴鏡民碑 各本訛唐皆隋臣死王事故貞觀中追立以表

唐之作

唐令狐文軌象銘 薛純正書各本同按薛純隨名人似脫隨字

唐獨孤使君碑 按周益公跋此碑題于志簡文

卷四目

唐中書令崔安禮碑 按宋光宗諱惇此書出宋版改敦為安避嫌名諱盧本作敦誤

唐國子司業于立政碑 陳遺玉八分書 一本義玉

唐劉黑仁等造徘徊碑 何義門校改思仁

唐天后少林寺碑 按此刻乃天后御製詩碑上應有詩字

唐歐陽詢妻徐夫人墓志 鄧玄挺撰 盧本作鄧廷朱本作庭

唐麴君碑 盧本作鞠

結一廬朱氏贖餘叢書

唐介休令張君清德碑 李愿撰 一本李愿

周醴泉縣令張仁蘊德政碑 長壽二年 按盧本作三年長壽止一年四月在

未改證聖以前亦書二年三年則決無此事矣此碑顏真卿書是時魯公年尚幼碑或是追書不然則名或誤耳

周冬官尚書李冲墓志 證聖元年三月 一本五月

昇州太子碑下 碑陰薛稷書附 前人校語云碑陰乃鍾紹京書非薛稷按今碑尚存

實則鍾薛各半耳

卷五目

周寇法師道德銘 長安三年九月 一本十月

周整法師龍門石龕象碑 范元愬正書 各本作袁按類編作范前司刑寺佛

跡碑亦范書

唐澠池縣宗人為高宗造象碑 神龍元年三月 一本五月

唐贈秦州都督唐宗碑 釋口曠正書 按此與北岳恆山碑

曠空格 卽智字

唐洛陽尉馬克忠碑 景龍三年二月 一本作三月

唐白鶴觀碑 八分書 按此碑尚存是正書非八分也

唐洛州刺史盧公善政頌 蘇說八分書 按說宜作說

唐司農卿盧萬石碑 先天元年十一月 一本作十月

唐荆王神祠記 先天元年十一月 一本作八月

唐安樂府典軍田敬嗣碑 一本作隋 按隋改嗣避宋諱說見前

唐贈歙州刺史葉慧明碑 按小注碑云兩行似是校語驛入各本無

唐明皇行次成皋詩 艾敘行書 按今碑尚存是史敘非艾敘

卷六 目

結一廬朱氏贍餘叢書

唐崔慧爽傳 薛僅撰 一本作作瑾

唐代國長公主銘 鄭萬鈞撰 并行書 按今碑尚存是正書非行書

唐珪禪師銘 宋儋撰 按盧本儋誤

唐大智禪師碑 嚴復撰 一本作嚴濬

唐館陶令徐君遺愛頌 張孚撰 宋瑗八分書 按盧本作宋瑗

孚受撰朱瑗八分書

唐傳菩薩戒頌 盧本作傳誤

唐內常侍趙泰宗碑 男尚容撰 盧本作內客

唐尚書省郎官廳石記 陳九言撰 今存拓本各本作張誤

唐扶溝令馬光琬頌 崔穎撰 一本作崔顥

卷七 目

唐讀樊丞相傳詩 鄭昞之撰胡霈八分書 按盧本有天寶二載四字胡霈

疑是胡霈然

唐李琳碑上 杜混元八分書 按下一千三百十二唐四禪寺萬菩薩像記之林混元疑

是一人類編有四禪寺碑亦作林混元盧本作温必是誤字

唐封孔子弟子詔上 盧本正書有空圍二格一本作紀正書

唐北齊范陽令宋君碑 郭慎徽撰 盧本作慎微

唐宰堵波幢銘 薛希昌八分書 希一本作呂

唐太子司議郎王元碑 朱璨八分書 一本作燦一本作粲

唐西河太守劉寂德政頌 孫(甫)撰 盧本作孫宰

唐康挺告 盧本作康挺

唐金城寺放生池碑 盧本有天寶十載七月六字

結一廬朱氏贍餘叢書

唐滎陽王妣朱氏墓志 韓擇木正書 一本作分書

唐贈文部郎中薛悌碑 蘇預撰 按一千三百六十一五原太守郭英奇碑碑亦蘇預

撰似是一人盧作蘇頌誤

唐宇文顥山陰述 按已見一千三百二十一此重出

唐王公城河申頌 陳翊撰 何氏改作翊

唐宋武受命壇記 陸淙八分書 盧本作宗葉本作深

唐長明燈頌 邵真撰王士則行書 按唐書家有王士則見寶刻類編邵真亦成德

軍判官同時人

卷八

唐崑臺銘 今碑作活

唐河瀆祠碑 王廷昌撰 盧本作延昌誤

唐崇徽公主手痕詩 李山甫等正書 按山甫唐末人其詩因手痕而附見耳

唐章仇公夫人魏氏墓志 李禎撰 一本作李禎

唐李氏移先塋碑 今碑移作塋

唐右堂銘 葉本作石堂

卷九

唐工部尚書辛京杲碑 貞元六年六月 一本作七月

唐新鸚鵡樓記 陳翊撰 一本作陳翊下忠武公將佐略同

唐忠武公將佐略碑 胡証八分書 按各本均作證今狄梁公祠碑尚存作証不誤

叢編亦作証

第一千六百四十五 元闕重脩茶舍記所缺者即此

唐彭正傳徐浩碑 盧据何校改王傳 張式撰次子現正書 盧本同按現當

結一盧朱氏贖餘叢書

作峴浩之子也唐昭義軍節度使王虔休碑靈珍禪師塔銘同

唐送李愿歸盤谷序 正書無姓名 一本有韓愈撰三字應從之

唐武甯軍大將新亭記 盧本作大將軍新廳記

唐會善寺記 一本記作誌

唐王處士引瀑泉記 武少儀撰 一本改少儀

唐心經 元和二年 盧本從錢本改長慶下明州南樓詩同

唐江南西使院小史記 盧本去一南字以為衍文按唐節度鎮江南西道非衍也

唐禹穴碑 元禎銘韓杼材行書 一本作韓特材按類編亦作杼特字誤清泉寺大藏

經記

唐衡嶽寺大德瑗公碑 王詡正書 一本詡作翊

卷十目

唐四望亭記

正書

今碑尚存是分書非正書

唐寶稱律師塔銘

開成四年七月

一本作十一月

唐白蘋洲五亭記

開成四年七月

一本作十月

唐常侍裴恭碑

盧述撰

一本作盧術

唐四證堂記

盧本作四證臺記

唐南瀆廣源公碑

大中十二年

盧本作十一年

唐楊滌妻張氏墓志

大中十三年

盧本作十一年

唐鄭畋謁昇仙太子廟詩

乾符四年閏二月

一本作四月

卷十一

跋尾

秦鐘銘

為莊公作也

盧按莊當作共各本俱譌

古器物銘第四

盧本按語別本於此添寫古器物銘第三此本無之足見此本之善

結一廬宋氏賸餘叢書

獻銘

狀方而四足

盧本而下有有字宋本無

又引墨子

盧本作文引誤

秦鐘銘

秦遂能攻戎

宋本同一本作秦能攻逐戎誤

毛伯敦銘

原父釋祝下一字為鄭

宋本同盧本祝作足

匱銘

右匱銘

盧本右作又誤

商雒鼎銘

居喪

盧本作君喪

卷十二

跋尾

秦權銘

凡四銘

盧本校云此銘字衍按宋本有銘字

周而復始

宋本同盧本作終而

復始

平周金銅鉦銘

銘作正當是金文從省

所謂五年者

宋本有者字盧本脫

谷口銅甬銘

始歐陽公集古錄

宋本有始字盧本脫

卷十三

跋尾

石鼓文 如此鼓及詛楚文 盧本鼓下 衍文字

卷十四 跋尾

漢陽朔塲字 尉府靈壁 據宋本 各本 靈作壺下同

漢居攝墳壇刻石 祝其卿墳壇 盧本其下 衍縣字

漢巴官鐵量銘 各本有此銘王無競見 遺七字宋本無今從之

漢國三老袁君碑 封貴陽侯 後作遺鄉按以遺為貴文 字缺誤傳寫者不復審爾

漢費亭侯曹騰碑 皇帝若曰 宋本同帝 作后誤

漢祝長嚴訢碑 人物同授 盧本授 作受 伊歎嚴君 盧本歎 作欺

招命道術 盧本招 作昭 舉孝廉 隸釋作 卑廉

卷十五 跋尾

漢孔子廟置卒史碑 卜守 宋本及隸釋均作 卜盧本作下誤 惶恐死罪

結一盧朱氏贖餘叢書

宋本同盧本惶作 皇又重死罪二字

漢吉成侯州輔碑 水經滄水 盧本上行犍縣二字 此本無與宋本合

漢韓明府孔子廟碑 所謂鹿者禮圖不載莫知為何器 錢穀

鈔本記其上云射禮有鹿中高一尺五寸為鹿形背設圓 箭以納算籌射畢以釋算之器也又有乏如屏所以為獲 者御矢恐即校其有木旁 正猶俎豆之為相榘歟

漢州輔墓石獸膊字 膊上 隸釋膊上 有左字 持以見寄 盧本持 作特

漢丹楊太守郭(曼)碑 下闕一字 按隸續 系癡字 淮夷蠶運 各本 誤迪

漢孫叔敖碑陰 可立碑祀 隸釋同各 本作碑誤 少子在江陵 隸釋 作甯

漢倉頡廟人名 其隸字 宋本同各 本作字畫 祀祔侯長 隸釋同各 本作侯誤

漢泰山都尉孔宙碑 宙孔北海父也 盧本作 孔宙

漢西嶽華山廟碑 所謂集靈者 宋本同盧本 者上有宮字

漢老子銘 古諡法無聃字 按此亦諡曰洞簫之諡人號之為聃以其老爾不謂易名也

卷十六 跋尾

漢車騎將軍馮緄碑 臨當受封以誣言 宋本作誣各本作謠 史復

拜廷尉 各本同各本史下有云字 拜屯騎將軍 宋本同盧從何氏据隸釋改作校尉 按

漢志將軍但有驃騎次車騎無屯騎也 驃騎車騎次公下亦不當復為廷尉

漢金鄉守長侯君碑 霸莽時為隨令 宋本同各本令作宰 碑以為

諡恐亦非是 按諡亦號也與諡曰聃同

漢淳于長夏承碑 累葉牧守印紱典據十有餘人 宋本同盧本紱

綬作

漢武都太守李翁碑 穆如清風 宋本同盧本作春風

漢成陽靈臺碑 堯母慶都慶都僊歿 宋本同各本不重 漢書地

結一廬宋氏贖餘叢書

理志皆曰成陽 宋本同各本無書字曰作云 東巡狩 各本作守 而述征

云 宋本同各本征下有記字

漢廷尉仲定碑 符節令 宋本與此同各本上有遷字 修完靈臺 宋本同盧

本完作堯

漢桂陽太守周府君頌 而亦不著其名 宋本同各本無亦字

漢石經遺字 據邕傳稱邕以經籍去聖久遠 宋本同各本無稱字

漢庠彰長斷碑 此碑所謂高祖自齊徙臨淄 按隸釋齊下有時字

卷十七 跋尾

漢梁相費汎碑 因以為姓 宋本同盧本以作妣 晉有詩 按費詩蜀志有傳非

也 晉人

漢費君碑陰 君暘家中落 宋本同盧本暘作舊 石勛字子才 宋本同盧

本作石勛字子才葉本作勛

漢太尉郭禧碑

返葬故郡

原本作鄉 据隸釋改

漢穀阮君神祠碑

石隄西戎樹谷

宋本同盧 本戎作戊

漢藁長蔡君頌

藁長

宋本同盧本 作臺下同

卷十八 跋尾

漢幽州刺史朱龜碑

蠻夷授手乞降

宋本同盧 本手作首

漢陳君碑

陳國相人

按隸續云陳國有柘 縣趙氏誤柘為相

漢巴郡太守樊君碑

霸佐匡弼

原本作霸伯 据隸釋改

陷附者眾

宋本同蓋言所陷之城所 附之人耳盧本陷作詔誤

漢宗資墓天祿辟邪字

延熹二年

宋本同盧本 作熹平誤

漢高陽令楊君碑陰

其曰白陵園令

宋本同各 本白作懷

結一廬朱氏贖餘叢書

漢司空宗俱碑

自均以下其姓皆當作宗而列傳轉寫為

宋誤也

按右軍臨河敘崇山中一筆穿透至上魯公八 關齋肅宗字下亦不作示殆以此傳寫訛爾

漢荊州從事苑君碑

宋本同盧 本君作鎮

漢酸棗令劉熊碑

字孟缺一字

宋本同盧本 作夾注誤

卷二十 跋尾

魏南郡太守卞統碑

猶有琅邪字尚存

宋本同盧本 無尚存二字

魏太僕荀君碑

惟其名字鄉里摩滅不可考矣

按魏志注 載荀氏家

傳衍字休若或弟三兄衍子紹 位至太僕則此碑為紹立耶

晉南鄉太守司馬整頌

命君南中郎將牧統宛都口

宋本 同盧

本牧下衍就字 宛下空格

卷二十一 跋尾

後魏叱閭神寶脩關城銘 官氏志及元和姓纂有叱閭氏

後改爲門 盧本首閭字 卽作門誤

後魏安東將軍孫公墓志 詔使加惠號惠蔚法師焉 各本無第

二惠字 似宜有

後魏賀拔岳碑 孝莊而此碑獨作孝壯 按此碑莊與壯通同甚多

卷二十二 跋尾

後周同州刺史普六如忠墓志 都督涇幽雲顯鹽靈等六

州諸軍事 各本作 邠誤

北齊馮翊王平等寺碑 高二丈八尺 一本作九尺 尺赤古通用

北齊大安樂寺碑 尉長命傳今碑乃作萇命 按六朝碑中長作萇莊作

壯多 通用

結一廬朱氏贍餘叢書

卷二十三 跋尾

唐孔子廟堂碑 至文口口 盧本作至 宣宗朝

唐杜如晦碑 其祖名果 與新書表傳同別 本從北史作杲

唐河間元王碑 戢武之名不見於他書 按玉海載唐實錄太宗與公卿謁見

太上皇於戢武殿置酒爲歡乙夜放散賜帛有差明日復置酒於凌煙閣殆戢武與凌煙相接故段志云碑亦云戢武閣也

獨孤使君碑 而其名不可辨 按周益公跋云名左從言

卷二十四 跋尾

唐于志甯碑 爲冠氏長 他本作寇 自中書侍郎遷兵部 他本下有

郎中二字 或作侍郎

卷二十五 跋尾

周昇仙太子碑 故武為葺其祠 他本武下有后字其實不

多甚

唐工部尚書姚璹碑 自工部侍郎 顧氏校語云自錢鈔

後周宇文舉碑 其曾孫做追建於神龍中 他本作神龍中

卷二十六 跋尾

唐盧懷慎碑 上因游鄂杜北望京闕 他本游作 時闕作國 抵其宅

甚陋 他本宅下

唐六公詠 恨不見其詩 盧本詩

唐趙冬曦祭仲山甫文 慕巍巍之盛 他本作

唐屯留令邢義碑 按前目 無此碑

卷二十七 跋尾

結一廬朱氏贍餘叢書

唐駙馬都尉豆盧建碑 北地王精之後 各本衍入字以北

為句按北地王精在燕為慕容麟所殺未 入後魏也其五世孫葛始賜姓豆盧氏 高祖勝以皇

始初歸魏 各本皇始上有燕字按皇始

唐京兆尹鮮于仲通碑 表請國忠兼領劍南節制 盧本作

新唐書國忠自請兼領劍南與此不 同或仲通先表請而國忠再自請歟 及為國忠頌功德

立碑耳 他本立碑在

卷二十八 跋尾

唐富平尉顏喬卿碣 家藏漢唐石刻四百卷 盧本脫唐字

刻斷無四百卷之理此石 即唐碣唐字萬不可去

唐放生池碑陰記 職官之濫 盧本作

唐康日知墓志 唐書日知傳云祖植開元中為左武威大

將軍而志云祖禕不仕他本作祖諱石生左

卷二十九 跋尾

唐義興縣重脩茶舍記按前目錄無此碑

唐顏杲卿碑 髮箱跳而前
明鈔本作跳箱

唐殷舟和尚碑 按前目錄無此碑

唐西平王李晟碑 怱應二子
明鈔本怱作慈

卷三十 跋尾

唐禮部尚書許康佐碑 嘿然不對
明鈔本盧本作暗默不對

趙氏金石錄宋本止存十卷 國初為嘉興馮研祥所

得刻一印曰金石錄十卷人家帖尾書頭往往鈐用傳
之藝苑以為美談後流轉於江玉屏阮文達韓小亭最

結一廬宋氏贖餘叢書

後歸潘文勤公鄭盦文勤師嘗出以相眎推為天壤間

驚人祕笈今尚在仲午比部所至舊鈔不乏流傳之本

大半出於明葉文莊所藏至刻本向推雅雨堂盧校為

最精而三長物齋等刻不足道矣一日二楞觀察手一

編示余鈔手極舊書籤題云津逮祕書人皆訝其不符

余笑而應之曰不觀津逮祕書目第六集金石錄未刊

即此書也首有劉跋序明誠自序後有李易安後序開

禧趙不謫跋明葉仲盛跋歸有光跋跳行空格均據宋

本其間黏籤甚多大半據盧本以校本書之誤閒有兩

通之字亦備列焉爰借吾友章碩卿大令藏校宋十卷

本並自藏明鈔校本成札記一卷雖未能全見宋刻然

似可與雅雨堂本相頡頏矣光緒乙巳清明後六日江陰繆荃孫撰

本其間... 陰繆荃孫撰... 似可與雅雨堂本相頡頏矣光緒乙巳清明後六日江陰繆荃孫撰

結一廬朱氏贖餘叢書

今存碑目

吉日癸巳字

石鼓文

秦泰山刻石

秦琅邪臺刻石

秦嶧山刻石

宋重刻本

漢居攝壇刻石二

漢南武陽功曹闕銘

漢南武陽功曹墓闕銘

漢王稚子闕銘

漢北海相景君碑

漢敦煌長史武班碑

漢武氏石闕記

漢司隸楊厥開石門頌

漢孔子廟置卒史碑

漢孔德讓碣

漢孔君墓碣

漢韓明府孔子廟碑

漢郎中鄭君碑

漢冀州刺史王純碑 拓本

漢倉頡廟人名

漢桐柏廟碑 元重刻本

漢泰山都尉孔宙碑

漢西嶽華山碑 拓本

漢車騎將軍馮緄碑 宋重刻本

漢魯相史晨孔子廟碑

漢竹邑侯相張壽碑

漢史晨孔子廟碑

漢柳孝廉碑 拓本

漢衛尉卿衡方碑

漢沛相楊君碑 拓本

漢涪子長夏承碑 拓本

漢武都太守李翁碑

漢博陵太守孔彪碑

漢李翕造郿閣頌

漢成陽靈臺碑 拓本

漢司隸校尉魯峻碑

漢^之儒先生碑 拓本

漢石經遺字 拓本

漢堂谿典嵩高山石闕銘

漢倉頡廟碑

漢三公碑

漢涼州刺史魏君碑 拓本

漢白石神君碑

漢幽州刺史朱龜碑 拓本

漢尉氏令鄭君碑

漢趙相劉衡碑 存額

漢小黃門譙君碑 拓本

漢圉令趙君碑 拓本

漢巴郡太守樊君碑

漢太尉楊震碑 拓本

漢高陽令楊君碑 拓本

漢光祿勳劉曜碑

漢執金吾丞武榮碑

漢酸棗令劉熊碑 拓本

漢益州太守楊宗墓闕銘

漢魯相謁孔子廟碑

漢武氏石室畫像一

漢戚伯著碑 拓本

仙人唐君碑

四皓神位刻石 拓本

魏受禪表

魏百官公卿奏

魏孔子廟碑

魏范式碑

吳九真太守谷府君碑

吳禪國山碑

晉太公碑

晉蘭亭序 帖本

晉樂毅論 帖本

後魏中嶽碑

後魏造三級浮圖碑

後魏孝文帝比干文

後魏鄭義碑

後魏鄭義上碑

後魏鄭道昭登雲峰山詩

後魏天柱山東堪石室銘

後魏兗州賈使君碑

梁許長史舊館壇記 拓本

後魏兗州太守張猛龍碑

東魏大覺寺碑 存額

東魏高翻碑

東魏孔子廟碑

後魏松滋公興溫泉頌

北齊夫子廟碑

北齊雲峰山題記

北齊天柱山銘

後周華嶽廟碑

碑一廬朱氏贖餘叢書

北齊隴東王感孝頌

北齊唐邕造像碑

北齊馮翊王平等寺碑

北齊臨淮王像碑

北齊白長命碑 拓本

北齊邸珍碑

隋老子廟碑

隋龍藏寺碑

隋正解寺造像碑

隋李氏像碑

隋梁州使君陳茂碑

隋舍利寶塔下銘

隋啟法寺碑 拓本

隋栖巖道場舍利塔碑

隋孔子廟碑

隋屯衛大將軍姚辯墓誌

重刻本

隋滏山石窟碑

唐太宗賜少林寺教書

唐宗聖觀碑

唐孔子廟堂碑

唐幽州昭仁寺碑

唐等慈寺碑

唐徐州都督房彥謙碑

唐化度寺邕禪師塔銘 拓本

唐九成宮醴泉銘

隋益州長史裴鏡民碑

唐右僕射溫彥博墓誌 拓本

唐三龕碑

唐孟法師碑 拓本

唐段志玄碑

唐贈比干詔 元刻本

唐晉祠銘

唐孔穎達碑

唐晉州刺史裴府君碑

隋皇甫誕碑

唐益州學館廟堂記

唐光祿大夫豆盧寬碑

唐房仁裕母李夫人碑

唐三藏聖教序

唐萬年宮銘

唐薛收碑

唐中書令崔安禮碑

唐散騎常侍張後胤碑

唐李靖碑

石目

七

唐尉遲敬德碑

唐紀功碑

唐蘭陵長公主碑

唐三藏聖教序并記

唐道因法師碑

唐清河公主碑

唐小字登封紀號文

唐于志雷碑

唐紀國先妃陸氏碑

唐孔宣尼碑

唐淄川公李孝同碑

結一廬朱氏贖餘叢書

唐碧落碑

唐三藏聖教序并述聖記

唐金剛經

唐馬周碑

唐阿史那忠碑

唐明徵君碑

唐李勣碑

唐開業寺李公碑

唐褚亮碑

唐述聖紀

唐美原神泉詩序

唐入都壇神君實錄

唐奉先觀老君像碑

周邛州刺史狄知遜碑

周乙速孤府君碑

周昇仙太子碑

周明堂令于大猷碑

周懷州大雲寺碑

周紀信碑

周棲巖寺詩

周宴石淙序

周石淙詩

唐白鶴觀碑

唐景龍觀鐘銘

唐雋州都督姚懿碑

唐光祿少卿姚彝碑

唐贈歙州刺史葉慧明碑 拓本

唐楊元珍碑

唐鬱林觀東崑壁記

唐孔子廟碑

唐^玄元觀尹尊師碑

唐李思訓碑

唐莎羅樹碑 帖本

唐御史臺精舍碑

唐涼國長公主碑

唐鄭司農碑 金重刻本

唐乙速孤行儼碑

唐明皇行次成臯詩

唐紀太山銘

唐北嶽碑

唐龍角山紀聖銘

唐麓山寺碑

唐大忍寺門樓碑 拓本

唐代國長公主碑

唐謁郭巨祠堂記

唐大智禪師碑

唐尉遲迴廟碑

唐任城縣橋亭記

唐易州鐵像頌

唐易州刺史田仁琬德政碑

唐唐儉碑

唐安公美政頌

唐夢真容碑

唐石壁寺鐵彌勒像頌

唐尚書省郎官廳石記

唐述聖頌

唐雲麾將軍李秀碑

唐大照禪師碑

唐兗公頌

唐韓賞祭華嶽文

唐靈巖寺頌

唐金錄齋頌

唐嵩陽觀紀聖德頌

唐明皇注孝經

唐安天王碑陰

唐多寶塔感應碑

唐武部尚書楊珣碑

唐東方朔畫贊

唐雲門山投龍詩

唐金天王題名

唐城隍神祠記

唐離堆記

唐贈太保郭敬之廟碑

唐太尉李光弼碑

唐怡亭銘

唐涪臺銘

唐李氏移先塋碑

唐李氏三墳記

唐大證禪師碑

唐贈揚州都督段府君碑

唐龔正令庠公德政碑 金刻本

唐麻姑仙壇記 重刻本

唐小字麻姑仙壇記 帖本

唐中興頌

唐玄靖先生碑 拓本

唐宋璟碑

唐般若臺銘

唐八關齋會記

結一廬朱氏贍餘叢書

唐黃石公祠記

唐于祿字書模本

唐乞題放生池碑額表

唐滑臺新驛記 拓本

唐贈兵部尚書王忠嗣碑

唐^之靖李先生碑 碎石

唐鮮于氏里門記

唐慧解寺三門樓讚

唐重修延陵季子廟記

唐重撫延陵季子墓刻

唐臧懷恪碑

唐元結碑

唐顏魯公與郭僕射書 帖本

唐張九齡碑

唐顏氏家廟碑

唐三藏和尚不空碑

唐李公楙功昭德頌

唐姜嫄公劉廟碑

唐茶山詩并詩述

唐軒轅鑄鼎原碑

唐會善寺戒壇記

唐鹽池靈應公神祠碑

唐彭王傅徐浩碑

唐焦贛碑

唐韋臯紀功德碑

唐楚金禪師碑

唐晉祠新松記

唐乘廣禪師碑

唐左拾遺竇叔向碑

唐徐州使院石柱記

唐南海神廟碑

唐贈太保李良臣碑

唐絳守居園池碑 宋重刻本

結一廬朱氏贖餘叢書

唐修浯溪記

唐平西王李晟碑

唐處州孔子廟碑

唐育王山常住田碑

唐義陽郡王苻璘碑

唐修龍宮寺碑

唐黃公記

唐太子太傅劉沔碑

唐魏公暮先廟碑

唐吏部尚書高元裕碑

唐重陽亭銘

唐圭峰禪師碑

唐鄭畋謁昇仙太子廟碑

唐瘞鶴銘

唐柘城令李公德政頌

唐題阮客舊居詩

唐楠木詩

唐嚴武題龍日寺西龕石壁詩

唐皇甫湜浯溪詩


歸來堂中二千卷今石止存二百餘煙雲過眼易磨滅
可憐石壽不如書



本朝金石分兩派蘭泉覃谿稱大師若論著述分軒輊

結一廬朱氏贖餘叢書

德父終勝黃伯思

荃孫輯畢復題一一絕





國立中央圖書館藏

書館印

